

TUTÚ CÚÚ ÒÚ NÍ CADÚHA TÉ PĀBLÚ QUÍHÍⁿ NDAHA ÑÁYIU ÑUÚ CÒRINTÚ

**Té Pāblú cādūha-dé tutú quíhíⁿ ndaha ñáyiú xīndecu ichi Xítohó Jesucrístú
ndécú ñúú Còrintú**

1 ¹Yúhú té Pāblú cāháⁿ-í tnúhu Xítohó Jesucrístú chi ducaⁿ ñí cachí Yă Ndiöxí cunduu. Te cādúha-í tutú-a ndihí té Timùteú té ndècu ndihí-o ichi-gá cuendá daquixi-í ndaha nchòhó ñáyiú xīndecu ichi Yă Ndiöxí ndécú ñúú Còrintú, te tutú-a cuu-xi tnàhá cuendá nchaá ñáyiú cùu cuendá Yă Ndiöxí xīndecu nchaá ñúú yíndèhu distritú Acáyá. ²Te xicáⁿ táhù-í núú Tātá-ó Dütú Ndiöxí ndihí núú Xítohó Jesucrístú sá ïo na chīndee chitúu ñaha-gă xii-ndo, te diu-ni ndi ndùú-gá ná càda te ïo váha cuu iní-ndó cūndecu-ndo.

Té Pāblú cāháⁿ-dé nchaá nācuāa ndòho-dé

³Te chí ná cāchí-ó sá ïo váha iní Dütú Ndiöxí Yaá cúú Tātá Xítohó Jesucrístú, te diu-ni Dütú Ndiöxí cúú-gă Yaá ïo cūndahú iní ñáhá xii-o, te diu-ni-gá cúú-gă Yaá táxí tnúhu ndee ìní. ⁴Te cuēi nāndi ndòho-o ndecu-o dico diu-ni Dütú Ndiöxí táxí-gă tnúhu ndee ìní xii-o, te ducaⁿ quide-gá cuendá sá nchóó cuāñaha-o tnúhu ndee ìní xii nchaá ñáyiú nāndi ndòho ndecu, te diu-ni nchaá tnúhu ndee ìní táxí-gă xii-o diu-ni nchaá tnúhu ndee ìní-áⁿ cuāñaha-o xii-yu. ⁵Te Xítohó Jesucrístú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vāi tnúhu ndee ìní ñihí-ó ndècu ndihí-o chi ndècu-o ndihí Xítohó Jesucrístú. ⁶Te nchúhú nāndi ndòho-ndí ndécú-ndí cuendá sá nchòhó ñihí-ndó tnúhu ndee ìní cundecu ndihí-ndo te naníhí tàhú-ndó. Te Yă Ndiöxí táxí-gă tnúhu ndee ìní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee ìní-áⁿ te naníhí tàhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷Te nchúhú ïo váha sàni ndáá iní-ndí cuendá-ndó chi ndòho-ndo datná ndóhó-ndí, te ducaⁿ tàxi Yă Ndiöxí tnúhu ndee ìní xii-ndo dàtná táxí-gă xii-ndí.

⁸Te nchòhó ñáyiú ndècu ndihí-ndí ichi Xítohó Jesucrístú cuení-ndí cachí tnúhu-ndí xii-ndo nācuāa ní yāha-ndí cútnàhá ní xīndecu-ndí distritú Àsiá

chi dàvá-áⁿ ïo ní ndoho-ndí, te luha-ná te vá cúndèe iní-ndí yáha-ndí nchaa tnúndòho-áⁿ ní cùu chi ní xehndé iní-ndí sá vǎ cǎcu-ndí. ⁹Chi ní sani iní-ndí sá ndïyi-ná cuu-ndí ní cùu, te ducaⁿ nǎ yáha-ndí cuendá sá ïo-gǎ quíndáá iní-ndí Yǎ Ndiöxí sá díú-gǎ taunihnu ñaha-gǎ xii-ndí, te ñá díú mèe-ndí taunihnu-ndí méé-ndí, te ñu-gǎ cúú-gǎ Yaá dándòto cuéi ñáyiú sa ní xíhí. ¹⁰Te ñu-ni-gǎ ní taunihnu ñaha-gǎ ñá túú ní sàhni ñaha ñáyiú xii-ndí, te ñu-ni-gǎ táúnìhnu ñaha-gǎ xii-ndí cuéi vitna, te cùtnuní ndáá iní-ndí sá díú-ní-gǎ taunihnu ñaha-gǎ xii-ndí núú cuàháⁿ núú vǎxi te vá cǎhni ñaha ñáyiú. ¹¹Te nchòhó tnhá-ndó chindee ñaha-ndo xii-ndí chi cǎháⁿ ndihí-ndo Yǎ Ndiöxí cuendá-ndí, te ío vǎi ñáyiú cǎháⁿ ndihí ñahá-yu xii-gǎ cuendá-ndí, te ducaⁿ ïo vǎi ñáyiú ndàcáⁿ táhù-yu núú-gǎ cuendá nchaa sá vǎha quide ñaha-gǎ xii-ndí.

Té Pǎblú cǎháⁿ-dé ná cuendá ñá túú ní náyaha-dé ñuú Còrintú

¹²Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuení Yǎ Ndiöxí cunduu ndècu-ndí ñuyíú-a, te ñu-ni ducaⁿ quide-ndí sá cúú-xí-ndó chi mee-gǎ cúndàhú iní ñahá-gǎ xii-ndí chindèe ñaha-gǎ, te ñá túú quide-ndí dàtná sání ìní cue ñáyiú ñuyíú-a. ¹³⁻¹⁴Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnuní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuení-ndí sá ïo-gǎ váha tecú tnuní-ndó cuendá sá òré ná quixi tucu Xítohó Jesucrístú, te dàvá-áⁿ ïo cada nínu ñaha-ndo xii-ndí dàtná cada nínu ñaha-ndí xii-ndo. ¹⁵Te cuendá xíǎⁿ ñuú ní sani iní-í yáha cǎháⁿ-í úú xito núú ndécú-ndó cuendá ío cudíí ìní-ndó. ¹⁶Chi ní sani iní-í sá òré quíhíⁿ-í distritú Macèdoniá te yáha cǎháⁿ-í núú ndécú-ndó, te òré ndixi tucu-í te nayáha cǎháⁿ tucu-í, te òré nayáha cǎháⁿ-í te taxi-ndo sǎ cúú ìchi-í cuendá quíhíⁿ-í distritú Jùdeá, duha ní sani iní-í ní cùu. ¹⁷Te sá dúcáⁿ ñá túú ní quixi coto ñaha-í xii-ndo te cudana sání iní-ndó sǎ yùhú ñá túú ní sǎha váha-í cuendá nàcuáa ní sani iní-í cada-í, àdi cudana ñáyiú ndècu ichi cuehé ichi duha, chi cue ñáyiú-áⁿ tnaa cǎchí-yu sá cúú càdá-yu ñá sá sání ìní-yu cada-yu te tnaa cǎchí-yu sá ñahá. ¹⁸Dico Yá Ndiöxí Yaá ío váha quide ndáá ñaha ndáá nahá cǎxi-gǎ sá nchùhú ñá túú dàma-ndí sá cǎháⁿ-ndí. ¹⁹Te yùhú ndihí té Silvanú ndihí té Timùteú dánèhé ñahá-ndí xii-ndo cuendá Xítohó Jesucrístú Yaá cúú Dèhe Yá Ndiöxí, te Xítohó Jesucrístú cúú-gǎ Yaá ñá túú dàma-gǎ tnúhu cǎháⁿ-gǎ, chi cùu-gǎ Yaá cǎháⁿ mee-ni tnúhu ndáá tnúhu cuiti. ²⁰Te ñu-ni Xítohó Jesucrístú cúú-gǎ Yaá quidé nchàa nàcuáa ní cachí Yǎ Ndiöxí. Te sá cuendá sá dúcáⁿ quide Xítohó Jesucrístú xíǎⁿ cǎchí-ó sǎ ïo cǎhnu cuu Yá Ndiöxí. Te nchaa-o na cǎchí-ó sǎ díú-ní dùcaⁿ na cada-gǎ. ²¹Te mee Yǎ Ndiöxí quidé-gǎ ndécú-ní-ó ìchi Xítohó Jesucrístú. Te ñu-ni mee-gǎ ní cǎháⁿ ñahá-gǎ xii-o

cuendá cunu cuechi-o nũú-gă. **22**Te Yá Ndiöxí ní quide-gá sá nchóó cùu-o ñáyiú cùu cuendá-gá, te ní taxi-gá Espíritú-gá ní ngúndecu ndihi-o cuendá cutnùní iní-ó sã ndàá cada ñaha-gă xii-o nàcuáa ní cachí-gá cada-gá.

23Te Yá Ndiöxí nãhá-gă sá yũhú cãháⁿ ndáá-í ná cuendá vátá quíxí-gă-í quixi coto ñaha-ĩ xii-ndo, te vátá quíxí-gă-í chi ñá túú cuiní-í dandihú-í iní-ndó. **24**Te nchúhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yã Ndiöxí, chi sa sàndáá váha iní-ndó-gă, chi nchúhú cuiní-ndí chindee tnũhu ñaha-ndĩ xii-ndo nàcuáa ío-gá cudíí iní-ndó cùndecu-ndo.

2¹Te ní sani ndáá iní-í sá vã quíxí ndĩhi-ni-í quixi coto ñaha-ĩ xii-ndo cuendá sá vã dándihú-í iní-ndó. **2**Te nchòhó cúú-ndó ñáyiú tàxi tnúhu ndee iní xii-í cudíí iní-í ndécù-í, te xíãⁿ nũu ñá túú cuiní-í dandihú-í iní-ndó, chi núu ducaⁿ na càda-í te vá cùndècu váha-gá iní-ndó nàcuáa taxi-ndo tnũhu ndee iní xii-í. **3**Te xíãⁿ nũu ní tendaha-ĩ tutú véxi ndaha-ndo cuendá sá òré quixi coto ñaha-ĩ xii-ndo, te dàvá-áⁿ quiní-í sá quidé-ndó nàcuáa cudíí iní-í te ñá díú dà dandihú-ndó iní-í òré quexì-í, chi nchòhó tàú-ndó càda-ndo sá yũhú cudíí iní-í. Te cùtnuní ndáá iní-í sá nũu yúhú cudíí iní-í te tnàhá nchòhó cudíí iní-ndó cuendá sá dúcáⁿ cùdíí iní-í. **4**Te ndàhyú-í sá ndìhú iní-í òré ní cadúha-í tutú ní dáquixì-í ndaha-ndo, chi ío cuéhé sã sání iní-í, te ñá túú ní dàquixi-í tutú-áⁿ ndaha-ndo cuendá sá dándihú iní ñáhà-í xii-ndo, chi ní dáquixì-í cuendá sá nchòhó cutnùní iní-ndó sã ïo cùu iní ñáhà-í xii-ndo.

Nàcuáa tàú ñáyiú ñuú Còrintú cadá-yu cuendá ìíⁿ ñáyiú ñá túú quide ndáá

5Te na càchí tnúhu-í xii-ndo cuendá ìíⁿ téé ní quide ìíⁿ sá ñá túú tàú-dé cada-dé ndécú ndihi-ndo, te ní quide ndàhú-xi luha iní-í cuendá sá ní quide-dé-áⁿ dico nchòhó tnàhá-ndó ñí dándihú-dé luha iní-ndó, te duha càchí-í sá lúhá-ní ñí dándihú-dé iní-ndó cuendá sá vã cuídó-gá-í ná tnúhu cãháⁿ-í. **6**Te nàcuáa ní ndatnúhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dě. **7**Te vitna tàú-ndó càda cahnu iní-ndó sã ñí quide-dé, te cuãñaha-ndo tnũhu ndee iní xii-dé chi núu ñáhá te vá ñihí ndéé-gă-dé cada-dé sá váha cuendá sá ndìhú iní-dé. **8**Te xíãⁿ nũu cãháⁿ ndàhú-í núú-ndó sã cádá tucu-ndo sá cúú iní-ndó-dě. **9**Te diu-ni cuendá iha cãháⁿ-í ìíⁿ núú tütú sá sà ní dáquixì-í ndaha-ndo, te ducaⁿ ñí quide-í xító ndèé ñáhà-í xii-ndo nũu ndisa cuiní-ndó càda-ndo nchaa nacúaa cãháⁿ-í. **10**Te nděda-ni càa ñáyiú na càda cahnu iní-ndó ìíⁿ sá quídě-yu, te tnàhá yúhú cada cahnu iní-í sá quídě-yu tucu. Te núu ìo ìíⁿ sá xíní ñũhu-xi cada cahnu iní-í te quide cahnu iní-í, te mee Xítóhó Jesucristú nãhá-gă sá dúcáⁿ quide-í, te ducaⁿ quide-í cuendá sá nchòhó cuu-xi sá váha

xii-ndo. ¹¹Te ducaⁿ te sácuíhná vǎ ñihí-xi ná cada ñaha-xi xii-o, chi nchoo sà xiní-ó nàcuáa quide-xi.

Té Pǎblú ndìhú iní-dé ndécú-dě ñuú Tròás

¹²Te ní xica-í cuáháⁿ-í ñuú Tròás cuendá yàcáⁿ cáháⁿ-í tnúhu sá cáháⁿ nàcuáa naníhí tàhú-ó tnúhu Xítóhó Jesucristú, te òré ní quexìo-í te ní níhì-í ììⁿ ichi cǎhnu cáháⁿ-í tnúhu-gá. ¹³Dico ñá túú ní cùu váha iní-í chi ñá túú ní nàníhì-í té Títú té ndècu ndìhi-o ichi Xítóhó Jesucristú, núu xíǎⁿ ní quide ndee ìní tnáhà-í ndìhi cue ñáyiu ñuú-áⁿ, te ní xica-í cuáháⁿ-í distritú Macèdoniá.

Dàquetìhú-ó yùcu ñávǎha chi ndècu ndìhi-o Xítóhó Jesucristú

¹⁴Te táxǎhu xii Yá Ndiöxí chi ducaⁿ-ni sànu ichi ñaha-gá xii-ndí nàcuáa cunuu-ndí núu yucu ñávǎha chi ndècu ndìhi-ndí Xítóhó Jesucristú, te mee Yǎ Ndiöxí sáchiuⁿ ñaha-gá xii-ndí cáháⁿ-ndí tnúhu-gá. Te cada iní-ó sǎ tnúhu-gá-áⁿ cúu-xí dàtná ììⁿ yúcu sǎ ìo váha sàháⁿ te ta xítenuu dicó-xi nděni ní cuu cuáháⁿ. Te ducaⁿ sǎtnahá-xi cùu tnúhu-gá chi nchúhú quidé-ndí nàcuáa ta xítenuu nděni ní cuu cuáháⁿ. ¹⁵Te cùu-ndí dàtná dicó ììⁿ yúcu sǎ ìo váha sàháⁿ, te nàcani cuendá Xítóhó Jesucristú núu Yǎ Ndiöxí, te dicó yúcu-ǎⁿ nchítá cuèi núu xíndecu cue ñáyiu sa ní naníhí tàhú, te cuèi núu xíndecu cue ñáyiu ta xíta nihnu cuáháⁿ. ¹⁶Te sá cúu-xí cuè ñáyiu ta xíta nihnu cuáháⁿ-áⁿ, dicó yúcu-ǎⁿ cúu-xí dàtná ììⁿ sá sáhní ñaha xii-yu, dico sá cúu-xí cuè ñáyiu sa ní naníhí tàhú, dicó yúcu-ǎⁿ cúu-xí dàtná ììⁿ sá ndécá ìní-yu, ducaⁿ sǎtnahá-xi cùu nchúhú. Te vitna chí cuǎha cuendá nǔu ná cúu ñáyiu sàni iní-ndó ndàcu cada nàcuáa ndùu tnúhu cáháⁿ-í-a. ¹⁷Chi nchúhú cáháⁿ-ndí tnúhu Yá Ndiöxí dico ñá túú ndǎhú quidé-ndí ndìhi tnúhu-gá dàtná xíquide dava-gá-güedé, chi quide ndáá-ndí cáháⁿ-ndí tnúhu-gá, te mee-gǎ ní cachí-gá sá dúcáⁿ càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndìhi-ndí Xítóhó Jesucristú.

Cuendá ingá núu sǎ vǎha ní cachí Yǎ Ndiöxí cada-gá ñáyiu

3 ¹Te cuèi duha cáháⁿ-ndí núu-ndó dico ñá túú xini ñuhu-xi sá cǔñaha-ndí xii-ndo sǎ cúu-ndí cue té quide váha, te ni ñà túú xini ñuhu-xi cacanehe-ndí ììⁿ tutú núu cáháⁿ-xi sá cúu-ndí cue té váha danèhé ñáhá xii-ndo datná xíquide dava-gá-güedé, te ni ñà túú xini ñuhu-xi sá nchòhó taxi-ndo ììⁿ tutú núu cáháⁿ-ndó sǎ nchúhú cúu-ndí cue té quide váha. ²Te ñá túú xini ñuhu-xi ducaⁿ cada-ndí. Te cùtnuní ndáá iní-ndí sá nchòhó cúu-ndó dàtná ììⁿ tutú sá ìo váha cáháⁿ cuendá-ndí. Te ducaⁿ sǎtnahá-xi cùu-ndo chi nchaa ñáyiu ñihí-yu tnúhu nàcuáa quide-ndo

ndecu-ndo, te xíãⁿ cútnùní iní-yu sá nchühú cúú-ndĩ cue tée quide váha. ³Te nchòhó cúú-ndó cuendá Xítohó Jesucristú, te cùu-ndo datná tutú-gá te tutú-áⁿ ñí táúchíúⁿ-gã xii-ndí ní cadúha-ndí, te mee-ni ndìhi Espíritú Yá Ndiöxí ní ngúndeé tnúhu-áⁿ te ñá díú ndìhi tindá ní ngúndeé. Te ñá díú ìⁿ núú yúú ní ngúndeé chi iní-ndó cùu-xi núú dúcáⁿ ñí ngúndeé tnúhu-áⁿ te ducaⁿ sãtnahá-xi cùu-ndo.

⁴Te duha càháⁿ-ndí chi cùtnuní ndáá iní-ndí sá Yá Ndiöxí quidé vãha ñaha-gã xii-ndí, chi ndècu ndìhi-ndí Xítohó Jesucristú. ⁵Te nchühú chi ndàcu-ndí quidé-ndĩ sá vãha dico ñá díú mèe-ndí ducaⁿ ndàcu-ndí quidé-ndĩ, chi mee Yá Ndiöxí chíndèe ñaha-gã xii-ndí nõu ndàcu-ndí quidé-ndĩ sá vãha. ⁶Te mee Yá Ndiöxí ní quide-gá sá nchühú ndacu-ndí cunu cuechi-ndĩ núú-gã cáháⁿ-ndí núú ñáyiú cuendá ingá núú sã vãha ní cachí-gã cada ñaha-gã xii-yu. Te sá vãha ní cachí-gã cada ñaha-gã xii-yu-áⁿ ñá túú ìⁿ-ni cuu-xi ndìhi nchaa tnúhu sá ñí xáhaⁿ-gã xii ndíi Moisés ní chídó tnùní ndíi, te ducaⁿ chi espíritú Yá Ndiöxí néhé chiuⁿ-xi nchaa tnúhu sá càháⁿ cuendá nchaa sá vãha-áⁿ. Te nchaa tnúhu ní chídó tnùní ndíi Moisés, dándixi túu-xi iní nchaa ñáyiú ndècu ndìhi tnúhu-áⁿ sã cuíta nihnú-yu cuendá nchaa cuéchi-yu, dico cue ñáyiú ndècu ndìhi Espíritú Yá Ndiöxí ñáyiú-áⁿ ndécú ndìhí-yu tnúhu ndee ìní sá cãcu nihnú-yu.

⁷Te tnúhu sá ñí cáháⁿ Yá Ndiöxí ndéé díhna nàcuáa cada ñáyiú ní ngúndeé-xi ìⁿ núú yúú quèhéⁿ. Te òré ní dátũu ndíi Moisés nàcuáa càháⁿ tnúhu sá ñí cáháⁿ Yá Ndiöxí ndèé núú yúú-ãⁿ nõú cuè ñáyiú isràél, te súní ñí tásaⁿ núú ndíi te ñá túú-gã ní cùu cundehé-yu núú ndíi, te ducaⁿ-gã ducaⁿ-gã quidé-xí dátásaⁿ-xi núú ndíi ni cùu ñá túú-gã ducaⁿ ni quide-xi. Te tnúhu ndèé núú yúú-ãⁿ dándixi túu-xi iní cue ñáyiú sá cuíta nihnú-yu sá cuendá nchaa cuéchi-yu, te ío váha ní quide-xi cútnahá ní ngúndecu ndìhi cue ñáyiú isràél tnúhu-áⁿ. ⁸Te sá dúcáⁿ ñí quide-xi xíãⁿ cútnùní sá tnúhu càháⁿ Espíritú Yá Ndiöxí vitna uuⁿ-gã ducaⁿ ìo-gã váha quide-xi. ⁹Te núu ducaⁿ ìo váha ní quide-xi cútnahá ní ngúndecu ndìhi cue ñáyiú isràél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uuⁿ-gã ducaⁿ vãha quide-xi vitna ní ngúndecu ndìhi-o tnúhu sá càháⁿ nàcuáa quide Yá Ndiöxí cuendá sá vã cúndècu-gã cuéchi ñáyiú núú-gã. ¹⁰Te vá càchí-ó sã cùtnahá ní ngúndecu ndìhi cue ñáyiú isràél tnúhu ndèé núú yúú-ãⁿ ìo-gã váha ní quide-xi, te ñáhá chi uuⁿ-gã váha quide-xi vitna cuendá tnúhu sá càháⁿ nàcuáa quide Yá Ndiöxí. ¹¹Te núu ducaⁿ ìo váha ní quide-xi cútnahá ní ngúndecu ndìhi ñáyiú isràél tnúhu sá ñá túú ní cùdíi, te uuⁿ-gã ducaⁿ ìo váha quide-xi vitna ní ngúndecu ndìhi-o tnúhu sá vã ndíhí nihnu tnahí-gã.

¹²Te cùtnuní iní-ndí sá vã ndíhí nihnu sá dúcáⁿ ìo váha quide-xi, núu xíãⁿ ío vii ío váha cùu iní-ndí càháⁿ-ndí tnúhu sá ñí ngúndecu ndìhi-o. ¹³Te

ñá túú quide-ndí dàtná ní xóo cada ndii Moisés, chi ndii-áⁿ ñí xóo dàdáhu ndii núú ndii òré dátäsaⁿ-xi núú ndii cuendá sá vǎ quini cue ñáyiú israhél òré ñá túú-gǎ dátäsaⁿ-xi núú ndii. ¹⁴Te cue ñáyiú israhél ñá túú ní tècú tnùnì váha-yu nàcuáa ní xóo danèhé ñáhá ndii Moisés xií-yu, te cuèi ndéé vitna ñá túú tècú tnùnì-yu òré dácuahá-yu tnúhu sá ñí cáháⁿ Yǎ Ndiöxí ndéé díhna nàcuáa cada-gá, te cada iní-ó sǎ dàtná sá ñí xídáhu núú ndii Moisés yídáhu núú-yu cuendá sá vǎ cútnùnì núú-yu cundèhé-yu te tecú tnùnì-yu, dico núu tnahá tnúhu-yu ndihi Xítohó Jesucristú te tecú tnùnì-yu. ¹⁵Te cuèi ndéé vitna òré dácuahá-yu nchaa tnúhu sá ñí chídó tnùnì ndii Moisés nchaa núú tütú ndii, te cada iní-ó sǎ dàtná sá ñí xídáhu núú ndii yídáhu núú-yu chi ñá túú tècú tnùnì-yu. ¹⁶Dico cue ñáyiú na tùha ñaha xii Xítohó Jesucristú te tècú tnùnì-yu tnúhu-gá. ¹⁷Te Xítohó Jesucristú ìⁿ-ni cùu-gá ndihi Espiritú Yǎ Ndiöxí, te nchaa ñáyiú ndècu ndihi Espiritú-gá ñá túú-gǎ táxi tnùnì ñáhá ñí ìⁿ sá ñà túú váha xií-yu. ¹⁸Te dàtná cúú ìⁿ yutátá sǎ dánèhé núú ñáhá-xí xii ñáyiú ìⁿ sá váha, ducaⁿ sǎtnahá-xi cùu-o chi quide-o nacuáa cáháⁿ ñáyiú sá ìo càhnu cuu Xítohó Jesucristú, te ducaⁿ ùuⁿ-gá uuⁿ-gá tá cundáá-ó ndècu-o ichi-gá dàtná quidé mèe-gá quidé ndǎá-gá. Te Espiritú-gá quidé-xí dùcaⁿ ta cundáá-ó núú-gǎ cuáháⁿ.

4 ¹Te mee Yǎ Ndiöxí ní cundáhú iní ñáhá-gǎ xii-ndí ní taxi-gá chiúⁿ quide-ndí càháⁿ-ndí tnúhu-gá, núu xiǎⁿ ñá túú tnàhí nàtúhú iní-ndí càháⁿ-ndí tnúhu-gá. ²Te nchúhú dàquee tǎhú-ndí nchaandi túhú sá ñà túú váha quide dayuhu ñáyiú, chi nchaa xiǎⁿ cúú-xí ìⁿ sácáⁿnúú sǎ cúú-xí-yu, te nchúhú ñá túú sàni iní-ndí dandáhú-ndí ñáyiú te ñí ñá túú sàni iní-ndí dama-ndí nàcuáa càháⁿ tnúhu Yá Ndiöxí, chi càháⁿ ndáá-ndí nàcuáa tàú-xi cáháⁿ-ndí, te mee Yǎ Ndiöxí náhá-gǎ nàcuáa ndùu tnúhu càháⁿ-ndí núú ñáyiú, te ñáyiú-áⁿ cútnùnì iní-yu sá nchúhú càháⁿ váha-ndí. ³Te cue ñáyiú ñá túú tècú tnùnì nàcuáa ndùu tnúhu sá càháⁿ nàcuáa naníhí tǎhú-ó càháⁿ-ndí núú-yu, ñáyiú-áⁿ cúú-yu ñáyiú ta xǐta nihnu cuáháⁿ. ⁴Te cue ñáyiú-áⁿ cúú-yu ñáyiú ío sàá iní-xi chi ñá túú cuini-yu quíndáá iní-yu tnúhu Xítohó Jesucristú, te xiǎⁿ núu sácuihná cúnùu-xi núú-yu te nihí-xi nàcuáa quide-xi dadáhu ndodo iní ñáhá-xí xií-yu cuendá sá vǎ tècú tnùnì-yu tnúhu sá càháⁿ nàcuáa naníhí tǎhú-yu, te tnúhu-áⁿ cúú-xí tnúhu sá ìo váha chi càháⁿ-xi sá ìo càhnu cuu Xítohó Jesucristú, te cùu-gá dàtná mèe Tǎtá-gǎ Dútú Ndiöxí. ⁵Te nchúhú ñá túú càháⁿ-ndí cuendá sá cúú-xí mèe-ndí núú-ndó chi càháⁿ-ndí cuendá Xítohó Jesucristú, te càhí-ndí xii-ndo sǎ díú-gǎ cúú-gǎ Yaá ío cùnùu, te càhí-ndí xii-ndo sǎ mèe-ndí cúú-ndí dìcò-ni cue tée xinu cuechi sá cúú-xí-ndó, te ducaⁿ quide-ndí nàcuáa cuu vii cuu váha iní Xítohó Jesucristú. ⁶Te Yá Ndiöxí Yaá ní dáyèhé ndéé cútnàhá nee ñuyúú ní cùu, Yaá-áⁿ ñí cachí-gá sá Xítohó

Jesucristú cada-gá nàcuáa tecú tnùní-ó sã ïo càhnu cuu mee Yá Ndiöxí. Te sá dúcáⁿ ñi quide-gá te cada iní-ó sã dàtná tnúhu sá ñi dáyèhé-gá iní-ó.

Ío quindáá iní-ó Yă Ndiöxí

⁷Te nchúhú ndécú ndìhi-ndí tnúhu Xítohó Jesucristú, te tnúhu-gá cúu-xí dàtná ìiⁿ sá ïo váha ñùhu ìiⁿ xití quídi ñuhu, te nchúhú cúu-ndí dàtná quídi-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nacuáa cutnùní sá méé Yă Ndiöxí quidé-gã nchaa sá váha te ñá díú mèe-ndí. ⁸Te cuèi ío ndòho-ndí ndécú-ndí dico ñihí-ndí nàcuáa quide-ndí tá yăha-ndí nchaa tnúndòho-áⁿ cuăháⁿ, cuèi áma sa ndètu vií-nă quehdé iní-ndí sá vă ndácú-ndí yăha-ndí nchaa tnúndòho-áⁿ, dico ndàcu-ndí yăha-ndí. ⁹Te cuèi nànducu ñaha ñáyiu cuìní-yu ná cada ñáhá-yu xii-ndí dico ñá túú dàña ñaha Yá Ndiöxí xii-ndí, te cuèi cànihá-yu xii-ndí dico cãcu-ndí ñá túú sàhni ñahá-yu. ¹⁰Te ndèni ní cuu cuáháⁿ-ndí xícá cùu-ndí, te cãcu cãcu cahni ñáhá-yu xii-ndí dàtná ní quidé-yu Xítohó Jesucristú, te ducaⁿ yăha-ndí cuèndá cutnùní sá ndécú tũu Xítohó Jesucristú andiu te chindee ñaha-gá xii-ndí. ¹¹Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuèndá Xítohó Jesucristú, te ducaⁿ yăha-ndí ndécú-ndí cuèndá cutnùní sá Xítohó Jesucristú ndécú ndìhi ñaha-gá xii-ndí cuèi vá cúdíi yiqui cùnú-ndí cundecu-xi. ¹²Te sá dúcáⁿ cãcu cãcu cahni ñaha ñáyiu xii-ndí xíãⁿ nchòhó uuⁿ-gá tá ñihí ndéé-ndó cuăháⁿ ndécú-ndó ìchi Xítohó Jesucristú.

¹³Te ìiⁿ téé ní xíndecu ndéé sanaha ñi chídó tnùní-dé núú tütú Yă Ndiöxí núú càchí-xi: “Yúhú ní sándáá iní-í Yă Ndiöxí ñuu xíãⁿ ní cáháⁿ-í”, duha ní cachí téé-áⁿ. Te dàtná-ni ní sani iní téé-áⁿ ñi cáháⁿ-dé te diu-ni ducaⁿ sàni iní nchúhú tucu núú xíãⁿ càchí-ndí: “Sándáá iní-ndí Yă Ndiöxí ñuu xíãⁿ cáháⁿ-ndí”, duha càchí-ndí. ¹⁴Te cùnuni iní-ndí sá ñuu na cùu-ndí te Yá Ndiöxí dandòto ñaha-gá xii-ndí dàtná ní dándótó-gã Xítohó Jesucristú, te tnàhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gã xii-o quíhíⁿ nucúndecu-o ñúú-gã. ¹⁵Te nchúhú nándi cùu sá tá yăha-ndí véxi cuèndá nchòhó ngúndecu váha-ndo, te ducaⁿ cuíta cáyá-gá ñáyiu ngúndecu váha sá xíí Yă Ndiöxí, te diu-ni ducaⁿ cuíta cuu vai-gá ñáyiu ndacáⁿ táhú-yu núú-gã te cachí-yu sá ïo càhnu cuu-gá.

¹⁶Te xíãⁿ ñuu nchúhú ñá túú tnàhí nàtúhú iní-ndí ndécú-ndí ìchi Xítohó Jesucristú, te cuèi yiqui cùnú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá ñihí ndéé-xí cuăháⁿ. ¹⁷Te nchaa sá ndóhó-ndí ñuyíú-a ñá túú càchí-ndí sá cúu-xí ìiⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiöxí ío váha cada ñaha-gã xii-ndí nduu na sàá-ndí núú ndécú-gã, te diu-ni ducaⁿ càda ñaha-gá xii-ndí ñi caa ñi quíhíⁿ. ¹⁸Te nchúhú ñá túú nchìcúⁿ

nihnu-ndí sá tũu ndèhe-ndí ìó ñuyíú-a, chi nchìcúⁿ nihnu-ndí sá vătă quíní-gá-ndí ndécú àndiu, te ducaⁿ quèide-ndí chi nchaa sá tũu ndèhe-ndí ìó ñuyíú-a vá cúdĩi-xi cundecu-xi, te nchaa sá ñà túú tũu ndècu andiu xíãⁿ cudíi-xi cundecu-xi ni caa ni quíhíⁿ.

5 ¹Te yiqui cùñú-ó cùu-xi datná ìiⁿ vehe, te vehe-áⁿ ñà túú cùdĩi-xi, te ducaⁿ sãtnahá-xi cùu yiqui cuñú-ó chi vá cúdĩi-xi, te na sàá nduu vã cùndècu-gá-ó ndìhi yiqui cuñú-ó, te Yá Ndiõxí taxi-gá ìiⁿ yiqui cùñú sáá sã cúú-xí-ó, te xíãⁿ cúú-xí dàtná ìiⁿ vehe sá ñà túú ní càdúha cue ñáyiu ñuyíú-a, chi mee Yã Ndiõxí ní cadúha-gá vehe-áⁿ te vehe-áⁿ cudíi-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cuñú sá táxí Yã Ndiõxí xii-o chi cudíi-xi cundecu-xi ni caa ni quíhíⁿ. ²Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuíní-ndí sá ìo ndìhi taxi Yá Ndiõxí yiqui cùñú sáá cùndecu ndìhi-ndí. ³Chi mee-gã vá dáñá-gã sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáá-ãⁿ xii-ndí. ⁴Te nini ndècu-ndí ndìhi yiqui cùñú-ndí vitna ìo sàni iní-ndí te ndìhú iní-ndí, dico ñá díú sã dúhá quèide-ndí te ñá túú-gã tnàhá iní-ndí cundecu-ndí ndìhi yiqui cùñú-ndí, chi cuíní-ndí sá Yã Ndiõxí ìo ndìhi taxi-gá yiqui cùñú sáá ndùu táhú-ndí, chi xíãⁿ cudíi-xi ni caa ni quíhíⁿ te yiqui cùñú-ndí sá tá ndìhi nihnu cuáháⁿ-a vá cúdĩi-xi cundecu-xi. ⁵Te ducaⁿ tnàhí ní cachí Yã Ndiõxí cunduu sá dúcáⁿ ndùu táhú-ó yiqui cuñú sáá-ãⁿ, te ní taxi-gá Espíritú-gá ní ngúndecu ndìhi-o cuèndá cutnùnì iní-ó sã ndàá taxi-gá yiqui cùñú sáá-ãⁿ nduu táhú-ó.

⁶Te xíãⁿ nũu nchúhú nihí ndéé-ndí ndécú-ndí, te cùtnuní iní-ndí sá nìni ndecu-ndí ndìhi yiqui cùñú-ndí sá ndécú ndìhi-ndí vitna te vătă sàá-gá-ndí cundecu-ndí mei nũú ndécú Xítohó Jesucristú. ⁷Te ducaⁿ cùtnuní iní-ndí chi sàndáá iní-ndí Yã Ndiõxí ndécú-ndí ñuyíú-a cuèi ñá túú xìní-ndí-gá. ⁸Te ìo váha cùu iní-ndí ndécú-ndí, te sàni iní-ndí sá vãha-gá sá nũu vá cùndècu-gá-ndí ndìhi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei nũú ndécú Xítohó Jesucristú. ⁹Te ìo ndècu ndee-ndí quídé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te dũu-ni ducaⁿ càda-ndí cuèi òré vá cùndècu-gá-ndí. ¹⁰Te dacuitíí sã ncháá-ó cùndecu-o núú Xítohó Jesucristú ìiⁿ nduu, te dàvá-áⁿ mee-gã cáháⁿ-gá te núu nása ndùu chiuⁿ ní quide-o ìiⁿ ìiⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìiⁿ ìiⁿ-o te ducaⁿ ndùu sá táxí-gã nduu táhú-ó.

Nàcuáa ní cuu ní ngúndecu váha-o ndìhi Yá Ndiõxí

¹¹Te nchúhú quíyühú iní-ndí nàcuáa cada Xítohó Jesucristú, núu xíãⁿ càháⁿ-ndí tnúhu-gá núú ñáyiu cuèndá xínu iní-yu tuha ñàhá-yu xii-gá. Te mee Yã Ndiõxí sa nàha-gá nàcuáa quèide-ndí ndécú-ndí, te sàni iní-ndí sá

nchòhó cutnùnì iní-ndó nàcuáa quide-ndí ndécú-ndí. **12**Te sá dúhá càháⁿ-ndí te vá cánì ìní-ndó sǎ nchùhú càháⁿ váha-ndí cuendá-ndí nàcuáa nchòhó cuu váha iní ñáhá-gǎ-ndó xì-ndí te ñáhá, chi duha càháⁿ-ndí cuendá sá nchòhó níhí-ndó tnùhu cáháⁿ váha-gǎ-ndó cuendá-ndí núú ñáyiú. Te ducaⁿ níhí-ndó tnùhu cúñaha-ndo xì cue ñáyiú quide nínu mee-xi, chi cue ñáyiú-áⁿ ñà túú quide cuendá-yu nása ndècu iní-yu. **13**Te núu nchòhó sání ìní-ndó sǎ lùcú-ndí cuendá nàcuáa quide-ndí ndécú-ndí te cùu-xi cuendá Yǎ Ndiöxí, àdi núu sání ìní-ndó sǎ ñà túú lùcú-ndí cuendá nàcuáa quide-ndí ndécú-ndí te cùu-xi sá vǎha sá cúú-xí-ndó. **14**Te quide-ndí nàcuáa cuìní Xítóhó Jesucrìstú chi cùtnunì iní-ndí sá ïo cùu iní-gǎ nchaa ñáyiú, te ducaⁿ xìnì ndáá-ndí sá ñí xíhí-gǎ cuendá nchaa-yu, te xǎⁿ núu cada iní-ó sǎ dàtná tnùhu sá ncháá ñáyiú ní xíhí-yu ndíhi-gǎ. **15**Te ducaⁿ ñí xíhí Xítóhó Jesucrìstú cuendá nchaa ñáyiú chi cuìní-gǎ sá ncháá-yu cundecú-yu cada-yu nàcuáa cuìní méé-gǎ te vá cádǎ-yu nàcuáa cuìní méé-yu, chi mee-gǎ ní xíhí-gǎ te ní ndoto-gǎ cuendá cuu-xi sá vǎha sá cúú-xí-yu. **16**Te xǎⁿ núu nchùhú ñá túú-gǎ ná sání ìní-ndí cuendá tnàha ñáyiú-ndí núu nàndíhi-yu àdi ñá túú nàndíhi-yu dàtná ní xóo canì iní-ndí cútnàhá ní xíndecu-ndí ichi cuèhé ichi duha, te dàvá-áⁿ ñí xóo canì iní-ndí cuendá Xítóhó Jesucrìstú dàtná sání ìní cue ñáyiú ndècu ichi cuèhé ichi duha vitna. **17**Te nchaa nchoo ñáyiú ní tnàhá tnùhu ndíhi Xítóhó Jesucrìstú ní nduu-o dàtná ìⁿ ñáyiú saa, te ducaⁿ chi ñá túú-gǎ quidé-ó dàtná ní xóo cada-o cùtnàhá ní xíndecu-o ìchi cuèhé ichi duha, chi ní ngúíta-o quide-o mee-ná sá vǎha te nchaa xǎⁿ cúú-xí sǎ sáá sǎ cúú-xí-ó chi vátá quìní-gǎ-ó càda-o.

18Te ducaⁿ quide-o ndecu-o chi mee Yǎ Ndiöxí quidé-gǎ sá dúcáⁿ càda-o cundecu-o. Te Xítóhó Jesucrìstú ní quide-gǎ ní ngúndecu váha-o ndíhi Yá Ndiöxí vitna, te ducaⁿ chi mee Yǎ Ndiöxí ducaⁿ tnàhí ní cachí-gǎ cunduu, te diu-ni mee Yǎ Ndiöxí ní taxi-gǎ chiuⁿ quide-ndí càháⁿ-ndí tnùhu-gǎ nàcuáa ngúndecu váha cue ñáyiú ndíhi-gǎ. **19**Te ducaⁿ chi mee-gǎ ní cachí-gǎ sá Xítóhó Jesucrìstú cada-gǎ nàcuáa nucúndecu váha nchaa nchoo cuè ñáyiú ndècu ñuyíú-a ndíhi Yá Ndiöxí. Te nchaa ñáyiú ní tuha ñaha xìi-gǎ ñá túú-gǎ sání ìní-gǎ sá ñáyiú-áⁿ nacháhu-yu cuéchi-yu núú-gǎ. Te mee Yǎ Ndiöxí ní taxi-gǎ chiuⁿ quide-ndí càháⁿ-ndí tnùhu-gǎ núú ñáyiú nàcuáa ngúndecu ndíhi ñaha vǎha-yu xii-gǎ. **20**Te Xítóhó Jesucrìstú ní cachí-gǎ sá nchùhú cáháⁿ-ndí tnùhu-gǎ núú nchaa ñáyiú, te sá dúhá quide-ndí càháⁿ-ndí tnùhu-gǎ te quide-ndí núú Yǎ Ndiöxí càháⁿ-ndí yuhu-gǎ, te xǎⁿ núu càháⁿ ndàhú-ndí núú-ndó sǎ tnàhá tnùhu-ndo ndíhi Yá Ndiöxí cuendá cundecu váha-ndo ndíhi-gǎ, te duha càháⁿ-ndí chi ducaⁿ càchí Xítóhó Jesucrìstú cada-ndí. **21**Te Xítóhó Jesucrìstú cúú-gǎ Yaá ñá túú tnàhí cuéchi-xi, dico Yá Ndiöxí ní quide ñaha-gǎ xii-gǎ dàtná ìⁿ ñáyiú

ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiú ñuyíú-a, te ducaⁿ ní xido Xítóhó Jesucristú nchaa cuéchi-o cuèndá sá nñu na tnàhá tnúhu-o ndìhi-gá te cudìu-o núú Yă Ndiöxí, te ducaⁿ ní cuu chi mee Yă Ndiöxí ducaⁿ ní cachí-gá cunduu.

6 ¹Te nchoo ñⁿ-ni cùu-o quide chiuⁿ-o cuèndá Yă Ndiöxí nñu xíăⁿ càháⁿ ndàhú-ndí núú-ndó sá vă dícó-ni ducaⁿ cùndedóho-ndo tnúhu Yá Ndiöxí, chi cada-ndo nàcuáa na chindee ñaha-ni-gá. ²Chi mee-gă cächí-gá ñⁿ xichi núú tütú-gá núú cächí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tànhú-ndó,

te ní sáá nduu tàú-xi sá cùndàhú iní ñáhà-í xii-ndo chindee ñaha-í cuèndá naníhí tànhú-ndó, núú xíăⁿ ní xíndedóho-í tnúhu ní cáháⁿ-ndó te ní chindee ñaha-í xii-ndo nàcuáa naníhí tànhú-ndó.

Duha cächí-gá núú tütú-gá. Te vitna cùu-xi nduu cundahú iní ñáhá Yă Ndiöxí chindèe ñaha-gá, te cùu-xi nduu naníhí tànhú-ó.

³Te nchúhú ñá túú quide-ndí ñⁿ sá ñà túú tàú-ndí cada-ndí sá cúú-xí ñáyiú, chi cuíní-ndí sá vă càháⁿ cuèhé-yu cuèndá chiúⁿ quide-ndí. ⁴Te nchaa sá quidé-ndí cúú-xí nàcuáa cutnùní iní cue ñáyiú sá nchùhú xínú cuèchi-ndí núú Yă Ndiöxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yăha-ndí véxi. ⁵Te duha ta yăha-ndí véxi, núú cánìha ñáyiú xii-ndí, núú chíhí ñàhá-yu vecaá, núú cuàá ndeé ñáhá ñáyiú xii-ndí xícuèhé ñáhă-yu, te ío ndòho-ndí quidé-ndí chiúⁿ Yá Ndiöxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí. ⁶Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yá Ndiöxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá văha nàcuáa chindee ñaha Espíritú Yă Ndiöxí xii-ndí, te ìo ndisa iní-ndí cúú ñihí-ndí cue tnàha ñáyiú-ndí. ⁷Te dānehé-ndí ñáyiú mee-ni tnúhu ndáá, te nchaa chiúⁿ quide-ndí te quide-ndí nàcuáa chindee ñaha Yá Ndiöxí xii-ndí, te cuèndá sá quidé ndáá-ndí ndécú-ndí nñu xíăⁿ ñihí ndeé-ndí dáquèe tíhú-ndí nchaa sá cuèhé sá dúhá. ⁸Te dava ñáyiú quide nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xăhăⁿ-yu xii-ndí, te davá-yu xícáháⁿ váha-yu cuèndá-ndí te davá-yu xícáháⁿ cuèhé-yu, te davá-yu cächí-yu sá dāndàhú-ndí ñáyiú dico ñá ndáá chi càháⁿ ndáá-ndí. ⁹Te davá-yu cächí-yu sá ñà túú xíní-yu ná ñáyiú cùu-ndí, te davá-yu cächí-yu sá xíní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cáhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cùú-ndí. ¹⁰Te cuèi ndìhú iní-ndí dico ñá túú dàña ndeé-ndí sá cùdǎ iní-ndí, te

cùu-ndí cue tée ndàhú dico sànu ichi-ndí vài ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñá túú nă ndécú ndìhi-ndí dico ñá túú nă cúmăní xii-ndí.

11Te nchòhó ñáyiú ndècu ndìhi-í ichi Xítóhó Jesucrìstú ndécú ñùú Còrintú ío cùu iní ñáhá-ndí xii-ndo, te ñi yùhu ñi iní-ndí càháⁿ-ndí nchaa tnúhu càháⁿ-ndí sá cúú-xí-ndó. **12**Te nchúhú chi ñi yùhu ñi iní-ndí cúú ìní ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. **13**Te yúhú càháⁿ ndàhú-í núú-ndó dàtná quidé ìⁿ tée cùu tátá òré càháⁿ ndìhi-dé cue déhe-dé sá ñi yuhu ñi iní-ndó cùu iní ñáhá-ndó xii-ndí dàtná quidé mèe-ndí cúú ìní ñáhá-ndí xii-ndo.

Nchoo cùu-o datná ìⁿ vehe Yá Ndiöxí

14Te cue ñáyiú ñá túú sàndáá iní tnúhu Xítóhó Jesucrìstú, te vá cúú ìⁿnuu-ndo ndìhí-yu cada-ndo dàtná xíquidé-yu, chi dèⁿ cuu nchaa sá vâha te dèⁿ cuu nchaa sá cuèhé sá dúhá, te ñúmí nchĩcanchii ndìhi niú chi ñá túú ìⁿ-ni cuu-xi. Te ducaⁿ sãtnahá-xi cùu nchaa sá vâha ndìhi nchaa sá cuèhé sá dúhá chi ñá túú ìⁿ-ni cuu-xi. **15**Te diu-ni ducaⁿ ñá túú ìⁿ-ni cuu Xítóhó Jesucrìstú ndìhi sácúíhná, te diu-ni ducaⁿ ñá túú ìⁿ-ni cuu ñáyiú sàndáá iní ñáhá xii Xítóhó Jesucrìstú ndìhi ñáyiú ñá túú sàndáá iní ñáhá xii-gá. **16**Te diu-ni ducaⁿ sãtnahá tucu-xi cùu vehe Yá Ndiöxí ndìhi nchaa sá càchí ñáyiú cùu ndióxí ní cadúha cue tée ñuyú-a, chi vá cúú quèhi ñi ìⁿ xíãⁿ xití vehe-gá. Te nchoo cùu-o datná vehe Yá Ndiöxí Yaá ndécú tũu andiú, chi mee-gã càchí-gá núú tütú-gá núú càchí-xi:

Yúhú vá cúmăní cundecu-í ndìhí-yu ndèni ní cuu na cùndecú-yu,
te diu-ni yúhú cuu-í Ndiöxí-yu,
te mée-yu cuú-yu ñáyiú cùu cuendá-í.

Duha càchí-gá núú tütú-gá. **17**Te xíãⁿ nũu càchí tucu-gá ingá xichi núú tütú-gá núú càchí-xi:

Chí tá quèe tnuú nchaa ñáyiú ñá túú sàndáá iní ñáhá xii-í,
te vá cání ìní-ndó càda-ndo ñi ìⁿ sá cuèhé sá dúhá,
te ducaⁿ te queheⁿ cuèndá ñáhà-í xii-ndo,

18te yúhú cuu-í Tãtã-ndó,
te nchòhó cuu-ndo cuè déhe ducuⁿ-í, ndìhi cue déhe yoco-í,
duha càháⁿ yúhú Yaá ío càhnu cuu.

Duha càchí-gá núú tütú-gá.

7 **1**Te sá dúcãⁿ ìo váha càháⁿ Yã Ndiöxí sá cúú-xí-ó nũu xíãⁿ càháⁿ-í dóho nchòhó ñáyiú ío cùu iní-í sá dùuⁿ duuⁿ dañã-o nchaa sá cuèhé sá dúhá, chi nchaa xíãⁿ ñá túú cùu-xi sá vâha sá cúú-xí ìní-ó ndìhi yiqui cuú-ó, te cada-o nàcuáa tàú-xi cunduu nàcuáa cundáá-ó nũú Yã Ndiöxí, te cada-o sã néhé-ó sã yíñùhu núú-gã.

Cue ñáyiú ñuú Còrintú quidé vǎha-yu

²Te ni yùhu ni iní-ndó chì cúú ìní ñáhá xii-ndí, chi nchúhú vá yǎo ñíⁿ quíde úhú iní-ndí, te ni vǎ yǎo ñíⁿ dàcuíta nihnu-ndí, te ni vǎ yǎo ñíⁿ dándahú-ndí. ³Te sá dúhá càháⁿ-í te vá cání ìní-ndó sǎ ñíⁿ cuéchi dàcaa-í díquí-ndó, chi dàtná sa ní cachí-í xii-ndo sǎ yǎhú ío cùu iní ñáhà-í xii-ndo, te cuéi vitna ndècu-gá-ó ñùyíú-a àdi cuéi na cùú-ó dico ñiú-ni ducaⁿ cùu iní ñáhà-í xii-ndo. ⁴Te yúhú ío váha sàni iní-í cuendá-ndó, te ducaⁿ ío váha càháⁿ-í cuendá-ndó, te ío ndècu ndihí-í tnúhu ndee ìní cuendá-ndó, te ío cùdíí ìní-í sá cuendá-ndó cuéi nándi ndòho-í ndihí dava-gá-güedé ndécú-ndí.

⁵Te nchúhú cútnàhá ní sáháⁿ-ndí distritú Macèdoniá, te ñá túú tnàhí ni ndètátú-ndí cuendá nchaa sá ñí yáhandi chi ío ní ndoho-ndí cuendá nchaa sá ñí quidé-yu, chi ío ní cuándeé ñáhǎ-yu xii-ndí, te ío ní sani iní-ndí ñuú nása-gá yáha-ndí ní cùu. ⁶Dico Yá Ndiǒxí ní taxi-gá tnúhu ndee ìní xii-ndí òré ní quexìo té Títú núú ndécú-ndí, te ñiú-ni Yaá-áⁿ cúú-gǎ Yaá sǎñaha-gǎ tnúhu ndee ìní xii-ndí cuendá sá ñí quexìo té Títú núú ndécú-ndí, te ñá díú-ní sǎ cuendá ní quexìo-dé chi ní níhí tucu-ndí tnúhu ndee ìní cuendá ní cani-dé cuendú núú-ndí sá nchòhó ní sǎñaha-ndo tnúhu ndee ìní xii-dé, te ní cachí tnúhu-dé xii-ndí sá nchòhó ío cuení-ndó cǎháⁿ ndihí ñaha-ndo xii-ndí, te ní cachí tnúhu tucu-dé xii-ndí sá nchòhó ío ndíhú iní-ndó cuendá nàcuáa cùu ndecu-ndo ni cuu, ndihí cuendá sá ío sàni iní-ndó cuendá-í, te sá dúcáⁿ ndùu cuendú ní cani-dé núú-ndí ñuú xǎⁿ ío ní cudíí ìní-í.

⁸Te nchòhó ní ndíhú iní-ndó cuendá tnúhu càháⁿ-í núú tütú sá ñí dáquixì-í ndaha-ndo, te òré ní níhí-í tnúhu sá ndíhú iní-ndó te tnaa-ni ní ndixi cuéchi iní-í sá dúcáⁿ ñí quíde-í te dàtnùnì ñá túú-gǎ ní ndixi cuéchi iní-í. ⁹Te vitna ní ndíhú iní-ndó, te xǎⁿ ní quíde-xi ní ndixi cuéchi iní-ndó sǎ ñá túú quíde váha-ndo ndècu-ndo ni cuu, te ní cudíí ìní-í dico ñá díú cuendá sá ni ndíhú iní-ndó ñí cudíí ìní-í chi cuendá sá ñí ndixi cuéchi iní-ndó, te ní ndíhú iní-ndó nàcuáa ní cuu váha iní Yǎ Ndiǒxí, te xǎⁿ ñuú ní cuu-xi ñíⁿ sá vǎha sá cúú-xí-ndó cuendá tnúhu ní cǎháⁿ-í te ñá túú ní cùu-xi ñíⁿ sá cuèhé sá cúú-xí-ndó. ¹⁰Te nchoo ñuú na ndíhú iní-ó nàcuáa cuu váha iní Yǎ Ndiǒxí, te ndixi cuéchi iní-ó te núu ñá túú quíde váha-ndècu-o, te sá dúcáⁿ quíde-o te náníhí tàhú-ó, te vá ndíhú iní-ó sǎ dúcáⁿ ñí quíde-o, te dava ñáyiú xíndecu ichi cuèhé ichi duha ndíhú iní-yu dico ñá túú ndixi cuéchi iní-yu cuendá nchaa sá ñá túú vǎha quíde-yu, te sá dúcáⁿ quíde-yu te cuíta nihnú-yu. ¹¹Te sá dúcáⁿ ñí ndíhú iní-ndó nàcuáa ní cuu váha iní Yǎ Ndiǒxí, te xǎⁿ ñuú ndècu ndee-ndo quíde-ndo nchaa nàcuáa tàú-xi cunduu, te vitna ni yùhu ni iní-ndó càháⁿ-ndó sǎ quíde vǎha-ndo, te

ío cùdéeⁿ-ndó nũú méé-ndó sã ñà túú quide váha-ndo ndècu-ndo ni cuu, te yùhú-ndó ndècu-ndo cuendá sã ñà túú quide váha-ndo ni cùu, te ío ní xúhuⁿ iní ñáhá-ndó xii-í, te ní ndúcú ndéé-ndó ñĩ quide ndáá-ndó cuendá téé ndècuéchi ndècu ndìhi-ndo, te sã dúcáⁿ ñĩ quide-ndo te xíãⁿ ní cutnùní sã méé-ndó ñà túú cuéchi-ndo. ¹²Te ní cadúha-í tutú ní dáquixì-í ndaha-ndo, te ní quide-ndo nàcuáa ní cáháⁿ-í, te sã dúcáⁿ ñĩ quide-ndo xíãⁿ ní cutnùní iní-ndó sã ïo cùu iní ñáhá-ndó xii-í. Te Yá Ndiöxí náhá-gã sã díú cuendá xíãⁿ ní dáquixì-í tutú ndaha-ndo, te ñá díú-ní cuendá sã sání iní-í cuendá téé ndècuéchi ndècu ndìhi-ndo, te ni ñà díú-ní cuendá ñáyiu ní dándìhú téé ndècuéchi-áⁿ iní-xi ní càdúha-í tutú ní dáquixì-í ndaha-ndo. ¹³Te cuendá sã quidé váha-ndo ndècu-ndo xíãⁿ cúú-xí tñũhu ndee iní ndécú ndìhi-ndí.

Dico ñá díú-ní xíãⁿ chi tñàhá ío cùdíí ìní-ndí cuendá sã ïo cùdíí ìní té Títú, te ducaⁿ cùdíí ìní-dé chi nchòhó ní sãñaha-ndo tñũhu ndee ìní xii-dé. ¹⁴Te yúhú ñá túú cùcahaⁿ núù-í sã ñĩ cáháⁿ váha-í cuendá-ndó nũú tẽ Títú cútnàhá vátá quixí-gã-dé núú ndécú-ndó, chi ní cutnùní ìní-dé sã ndáa càháⁿ váha-í nàcuáa quide-ndo datná cúú-xí sã ndáa nchaa tñúhu dàcuaha ñaha-í xii-ndo. ¹⁵Te vitna ío-gá váha cùu iní té Títú cuendá-ndó, chi ndàcu ìní-dé sã ncháá-ndó ïo váha ní tñii-ndo nchàa tñúhu ní cáháⁿ-dé núú-ndó, te ndàcu tucu ìní-dé sã ñĩ queheⁿ cuendá váha-ndo-dě, te ní dátũu-ndo nũú-dě sã ïo ní quiyùhú ìní-ndó sã vã ndácú-ndó càda-ndo nchaa nacuáa tàú-xi cunduu. ¹⁶Te ío cùdíí ìní-í cuendá-ndó chi cùtnuní ndáá ìní-í sã ñà túú dàña ndéé-ndó quide-ndo nchaa nacuáa tàú-xi cunduu.

Ío váha cuu ìní-ó chindee tñaha-o

8 ¹Te nchòhó ñáyiu ndècu ndìhi-ndí ichi Xítóhó Jesucristú càchí tñúhu-ndí xii-ndo nàcuáa quide ñaha Yá Ndiöxí xii cue ñáyiu xĩndecu ichi-gá ndécú dístiritú Macèdoniá, chi ío chindee ñaha-gá xii-yu cuendá sã quidé váha-yu ndécú-yu. ²Te cuéi ndòho vihí-yu ndécú-yu dico ío-ni cùdíí ìní-yu, te cuendá xíãⁿ nũu ni yùhu ni ìní-yu ní sacáⁿ tñáhã-yu díhúⁿ sã cúú-xí tñàha ñáyíú-yu, te ñá túú tñàhí ni xĩnduu díi-yu cuéi ío ndàhú-yu. ³Te ñá díú-ní nàcuáa ní sani ìní-yu ndacú-yu cacáⁿ tñáhã-yu, chi ní quide yica ìní-yu ní sacáⁿ tñáhã-gã-yu, te yúhú càchí tñúhu ndáá-í xii-ndo sã ñĩ yuhu ni ìní-yu ducaⁿ ñĩ quidé-yu. ⁴Te ío ní cáháⁿ ndàhú-yu núú-ndĩ cuendá sã cuãha-ndí tñúhu sã tñàhá-yu chindèé-yu dava-gá cue ñáyiu cùu cuendá Yã Ndiöxí. ⁵Te ñá díú-ní nàcuáa ní sani ìní-ndí ní quidé-yu, chi ní xídó-gã-yu ní quide váha-yu, te ducaⁿ chi mèé-yu ní sani ìní-yu sã cãdã-yu nchaa nàcuáa cuiní Yã Ndiöxí, te dãtnùní ducaⁿ te ní cachí-yu sã cúú càdã-yu nchaa nàcuáa na cũñaha-ndĩ xii-yu. Te ducaⁿ ñĩ quidé-yu chi ducaⁿ ñĩ cuiní méé Yã Ndiöxí cunduu. ⁶Te sã dúcáⁿ ñĩ quide ñáyiu-áⁿ nũu xíãⁿ

càháⁿ ndàhú-ndí núú tẽ Títú sá quíxí tùcu-dé núú ndécú-ndó cuendá dàxínu cava-dé chiùⁿ sá sà ní ngüíta-dé quidé-dẽ dátacá-dé díhúⁿ sã sà ní ngüíta-ndo sàcáⁿ tnáhá-ndó, te ducaⁿ quide-ndo chi cùndahú iní-ndó tnàha ñáyiu-ndo. ⁷Te nchòhó cúú-ndó ñáyiu ío ngòdónúú quide nchaa sá vãha, te ío váha sàndáá iní-ndó Xítohó Jesucrístú, te ío váha cùtnuní iní-ndó nàcuáa càháⁿ tnúhu-gá, te ío váha dàcuaha-ndo ñáyiu tnúhu-gá, te ío ndùcu ndee-ndo quide-ndo mee-ni sá vãha, te ducaⁿ ïo cùu iní ñáhá-ndó xii-ndí, te sá dúcáⁿ quide-ndo núú xíãⁿ càháⁿ ndàhú-í núú-ndó sã ngòdó núú-gã-ndó càda-ndo sá cúú-xí tnàha ñáyiu-ndo.

⁸Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyiu ndècu ichi Xítohó Jesucrístú, chi cue ñáyiu-áⁿ ni yùhu ni iní-yu quidé-yu sá vãha sá cúú-xí tnàha ñáyíu-yu, te càchí tnúhu-í xii-ndo nàcuáa quidé-yu cuendá cutnùní nũu nása cada-ndo nũu ndisa sá cúú iní-ndó cuè tnaha ñáyiu-ndo. ⁹Te nchòhó sa xíní-ndó sã Xítohó Jesucrístú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní quide váha ñaha-gã xii-o, te ñuyíú-a ñá túú ní xĩndecu váha-gá, te ducaⁿ ñĩ quixi-gá ñuyíú-a cuèi ñá túú ní xĩndecu váha-gá cuendá sá nchóó ngũndecu váha-o nũú ndécú-gã.

¹⁰Te na càchí tnúhu-í xii-ndo nàcuáa sàni iní-í. Chiùⁿ sá ñè yuhu ni iní-ndó ñĩ ngüíta-ndo quide-ndo cuíá ñè yáha chi cùu-xi sá vãha sá cúú-xí-ndó nũu na dàxínu cava-ndo. ¹¹Te dàtná-ni ni yùhu ni iní-ndó ñĩ tausaha-ndo chiùⁿ-áⁿ te ducaⁿ-ni ñè yuhu ni iní-ndó dàxínu cava-ndo, te cacáⁿ tnáhá-ndó sã ndécú ndìhi-ndo nacuáa xito mee-ndo ndacu-ndo. ¹²Te núu nchòhó ni yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiõxí, chi mee-gã sa nàha-gá nása ndècu-o te ndùu vétú-ni iní-gá.

¹³Te sá dúhá ndùu tnúhu càháⁿ-í te vá cání iní-ndó sã yúhú cuení-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. ¹⁴Te vitna ndècu ndee iní-ndó nàcuáa ndacu-ndo chĩndee-ndo cue ñáyiu xini ñuhu, te nduu ñà túú ndècu ndee iní-ndó te cue ñáyiu-áⁿ chĩndee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú ñã cumání xii-ndo te ni cuè ñáyiu-ãⁿ ñá túú ñã cumání xí-yu. ¹⁵Te ducaⁿ te quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Cue ñáyiu ío vãi sá ni ñíhí ñá túú ní cùu sobrá xí-yu, te cue ñáyiu sacú ní ñíhí ñá túú ní cùmání xí-yu”, duha càchí-xi núú tütú-gá.

Té Títú ndìhi cue tée cùndìhi-dé

¹⁶Te ndàcáⁿ táhù-í núú Yã Ndiõxí chi mee-gã ní quide sá tẽ Títú ío ñuhu iní ñáhá-dẽ xii-ndo dàtná ñúhú iní ñáhà-í xii-ndo. ¹⁷Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá dífú mèe-ni

sá dúcáⁿ ñí xáhaⁿ-í xii-dé quixi coto ñaha-dě xii-ndo, chi mee-dě cúdíí tñahí iní-dé quixi coto ñaha-dě xii-ndo.

18Te tendaha-ndí ìíⁿ téé ndècu ndíhi-o ichi Xítóhó Jesucristú quixi-dé ndíhi té Títú, te téé quixi ndíhi té Títú-áⁿ cúú-dě ìíⁿ téé ío váha càháⁿ cue ñáyiú xñdecu ichi Xítóhó Jesucristú cuendá-dé cuendá sá ìo váha quide-dé chiuⁿ Xítóhó Jesucristú càháⁿ-dé tñuhu-gá tñuhu sá càháⁿ nàcuáa naníhí tñhú-ó. **19**Te cue ñáyiú xñdecu ichi Xítóhó Jesucristú ñá díú-ní sá càháⁿ váha-yu cuendá-dé, chi tñahá ní cáxi ñahá-yu xii-dé cuendá sá cacá cuu ndíhi ñaha-dé xii-ndí chindee ñaha-dé tacá sá cúú-xí ñáyiú ndàhú, te quide-ndí chiuⁿ-a cuendá ío cuu càhnu Yá Ndiöxí, te cue ñáyiú cutnùní iní-yu sá nchòhó ñí yùhu ñí iní-ndó quide-ndo nchaa sá vaha sá cúú-xí cuè tñaha ñáyiú-ndo. **20**Te cuìní-ndí sá vã càháⁿ cuèhé ñáyiú cuendá nàcuáa quide-ndí ndíhi sá ngäutñaha sá cúú-xí cuè tñaha ñáyiú-o, te ío vai cuu-xí. **21**Chi ndùcu ndee-ndí quidé-ndí nàcuáa cáháⁿ váha Xítóhó Jesucristú cuendá-ndí, te quide tucu-ndí nàcuáa cáháⁿ váha ñáyiú sá quidé vaha-ndí.

22Te tendaha tucu-ndí ìngá tucu téé ndècu ndíhi-o ichi Xítóhó Jesucristú quixi-dé ndíhi cue téé úú quixi coto ñaha xii-ndo, te téé quixi ndíhi-güedé-áⁿ ñí cuu vai xito quide-dé nàcuáa cutnùní iní-ndí sá ìo ndùcu ndee-dé quidé-dě sá vaha, te vitna ío-gá cuìní-dé cada-dé sá vaha vitna quixi-dé núú ndécú-ndó, chi cùnuní ndáá iní-dé sá cúú-ndó cuè ñáyiú quide váha. **23**Te càchí tñuhu-í xii-ndo sã tẽ Títú cúú-dě ìíⁿ téé cùnndíhi-í quidé-ndí chiuⁿ Xítóhó Jesucristú, te tñahá-dé cúú-dě ìíⁿ téé xinu cuechi núú-ndó càháⁿ-dé tñuhu-gá. Te càchí tñuhu tucu-í xii-ndo cuendá cue téé úú quixi ndíhi-dé, chi cue téé-áⁿ cúú-güedě cue téé tendaha cuè ñáyiú xñdecu ichi Xítóhó Jesucristú quixi coto ñaha xii-ndo. Te cue téé-áⁿ quidé-güedě nàcuáa cachí ñáyiú sá ìo càhnu cuu Xítóhó Jesucristú. **24**Te chí cadá sã cúú ñí ndisa-ndo-güedě cuendá ducaⁿ na cùnuní iní nchaa dava-gá ñáyiú xñdecu ichi Xítóhó Jesucristú sá ndáá ndisa ducaⁿ quide-ndo, te ducaⁿ cùnuní iní-yu sá ndáá ndisa quide váha-ndo dàtná càháⁿ-ndí cuendá-ndó sã quidé vaha-ndo.

Cuendá sá ngäutñaha sá cúú-xí cuè ñáyiú xñdecu ichi Xítóhó Jesucristú

9 **1**Te cuendá sá ngäutñaha sá cúú-xí cuè ñáyiú ndècu ichi Xítóhó Jesucristú ñá túú-gã xíní ñùhu-xi cachí tñuhu-í xii-ndo nùú tütú-a nàcuáa cada-ndo, **2**chi sa cùnuní iní-í sá ìo cuìní-ndó chindee-ndó-yu. Te ducaⁿ-ni ìo váha càháⁿ-í cuendá-ndó nùú ñáyiú xñdecu ichi Xítóhó Jesucristú ndécú dístítú Macèdoniá, te xáhaⁿ-í xií-yu sá nchòhó ñáyiú xñdecu ichi Xítóhó Jesucristú ndécú dístítú Acãyá sa ní cuu ìíⁿ cuíá ducaⁿ cuìní-ndó cacáⁿ tñahá-ndó sã cúú-xí cuè ñáyiú ndàhú ndécú ìchi-gá. Te vai cue ñáyiú dístítú Macèdoniá cuìní-yu cacáⁿ tñahã-yu sá cúú-xí cuè ñáyiú

ndàhú ndécú ìchi Xítóhó Jesucristú cuendá sá nǐ níhǐ-yu tnúhu sá nchòhó ío cuení-ndó dùcaⁿ cada-ndo. ³Te cuendá sá sání ìní-ndó càda-ndo xiǎⁿ tendaha-ǐ cue téé ndècu ndihì-o ìchi Xítóhó Jesucristú quixi-güedé núú ndécú-ndó cuendá dàtúha ñaha-güedě xii-ndo, cuendá sá vǎ quée ndèhnde-í núú ñáyiú sá nì cáháⁿ váha-í cuendá-ndó, te ducaⁿ cùndecu túha ndisa-ndo dàtná sa ní cáháⁿ-í núú-yu. ⁴Chi na cuáháⁿ ndèé quixi-í ndihì ìⁿ úú cue ñáyiú distritú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá nì cáháⁿ váha-í cuendá-ndó te núú ñà túú ndècu túha-ndo, te tnàhá-ndó cùcahaⁿ núú-ndó. ⁵Te xiǎⁿ núú nǐ sani iní-í sá vǎha-gá codonùu cue téé ndècu ndihì-o ìchi Xítóhó Jesucristú quixi coto ñaha-güedě xii-ndo cuendá chindee ñaha-güedé tacá sá nǐ sani iní-ndó càcáⁿ tnàhá-ndó cuendá sá cùndècu túha-xi, te cuu-xi dàtná ìⁿ táhú sǎ nǐ quene cuu iní méé-ndó càcáⁿ tnàhá-ndó sǎ cúú-xí cuè tnaha ñáyiú-ndo. Te ducaⁿ te vǎ yǒo cani iní-xi quesàhá-yu sá nchùhú ní quide yica-ndǐ ducaⁿ nǐ sacáⁿ tnàhá-ndó.

⁶Te nchòhó sa xìní-ndó sǎ ñáyiú na chìhi vai tatá te vǎi ñíñí-yu cùu, te cue ñáyiú na chìhi sacú tatá te sacú ñíñí-yu cùu. Ducaⁿ sǎtnahá-xi cùu ñáyiú sàcáⁿ tnàhá sǎ cúú-xí tnàha ñáyiú-yu. ⁷Te ìⁿ ìⁿ-ndo càcáⁿ tnàhá-ndó nàcuáa quène cuu iní méé-ndó, te ío váha cuu iní-ndó dùcaⁿ cada-ndo te vǎ cádá-ndó cuendá-ni sá quidé yìca ñaha ñáyiú xii-ndo, chi Yá Ndiöxí cúú vǎha iní-gá núú nchàa ñáyiú cùdǐ ìní sàcáⁿ tnàhá sǎ cúú-xí cuè tnaha ñáyiú-xi. ⁸Te Yá Ndiöxí ndacu-gá chindee ñaha-gá xii-ndo nàcuáa cundecu váha-ndo, chi ñiú-gá cada te níhí-ndó nchàa núú sǎ xìní ñùhu-ndo cundecu ndihì-ndo, te ñà túú tnàhí-gá ná cumání xii-ndo, te mee-gǎ chindee ñaha-gá xii-ndo níhí-ndó ìo vǎi cundecu ndihì-ndo cuendá ducaⁿ chindee-ndo cue tnaha ñáyiú-ndo. ⁹Te núú tütú Yǎ Ndiöxí càchí-xi ìⁿ xichi:

Ìⁿ ñáyiú ío vǎi sá nǐ sǎñàhá-yu xii ñáyiú ndàhú,
te sá nǐ quide ñáyiú-áⁿ nǐ cuu-xi sá vǎha sá vǎ yǒo cùnaa.

Duha càchí-xi núú tütú-gá. ¹⁰Te mee Yǎ Ndiöxí táxi-gǎ nchaa sá cúú tàtá nchaa nchòhó ñáyiú xìtu nándí sá xítú cuendá cuu sá cúú nchìto-ndo, te ñiú-gá cada te ío vǎi sá níhí-ndó cùndecu ndihì-ndo, te ducaⁿ ìo-gá vǎi sá vǎha cada-ndo sǎ cúú-xí cuè tnaha ñáyiú-ndo. ¹¹Te Yá Ndiöxí taxi-gá vǎi núú sǎ cùndècu ndihì-ndo cuendá ducaⁿ nǐ yuhu nǐ iní-ndó vǎi cuáñaha-ndo sǎ cúú-xí tnàha ñáyiú-ndo. Te cuendá nchaa sá sàcáⁿ tnàhá-ndó quèheⁿ cuendá-ndí cuu xii tnàha ñáyiú-ndo, te cue ñáyiú-áⁿ ìo ndacáⁿ táhǐ-yu núú Yǎ Ndiöxí cuendá sá dúcáⁿ sàcáⁿ tnàhá-ndó sǎ cúú-xí-yu. ¹²Te sá dúcáⁿ quide-ndo sacáⁿ tnàhá-ndó sǎ cúú-xí cuè ñáyiú cùu cuendá Yǎ Ndiöxí, te ñáyiú-áⁿ ñà túú-gǎ ná cumání xií-yu, te ío ndacáⁿ táhǐ-yu núú Yǎ Ndiöxí sá dúcáⁿ quide-ndo. ¹³Te ñáyiú-áⁿ cutnùní iní-yu sá

nchòhó quidé-ndó sã sàndáá ndisa iní-ndó tnũhu Xítohó Jesucrístú, te cuendá xíáⁿ te ñáyiu-áⁿ chinũhú-yu Yá Ndiöxí, te cuendá sá dúcáⁿ nì yuhu ni iní-ndó sàcáⁿ tnáhá-ndó sã cúú-xí-yu ndìhi sá cúú-xí nchàa dava-gá ñáyiu, te cachí-yu sá ïo cànnu cuu Yá Ndiöxí. ¹⁴Te ñáyiu-áⁿ cãháⁿ ndìhí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yã Ndiöxí chindèe ñaha-gá xii-ndo quide-ndo sá vãha sá cúú-xí-yu ndìhi dava-gá ñáyiu. ¹⁵Te ío ndàcáⁿ táhú-ó nũú Yã Ndiöxí cuendá sá ñí taxi-gá sá ïo váha ndècu ndìhi-o, te ni ñã cútnùnì iní-ó ñasa cunduu tnúhu cãháⁿ-ó cuendá sá vãha ní taxi-gá.

Té Pãblú ndécú ndìhi-dé tnúhu ndee ìní sá cãháⁿ-dé tnúhu Xítohó Jesucrístú

10 ¹Te Xítohó Jesucrístú ío cànnu iní-gá, te cùndahú iní ñáhã-gã xii-o chindee ñaha-gá, núu xíãⁿ yúhú té Pãblú ducaⁿ quide-í cãháⁿ ndàhú-í núú-ndó nàcuáa cada-ndo. Te dava-ndo cãchí-ndó sã yũhú ío ndàhú iní-í òré ndécú ndìhi ñaha-í xii-ndo, te òré ñá túú ndècu ndìhi ñaha-í xii-ndo te ío ñíí cáà-í. ²Te cãháⁿ ndàhú-í núú-ndó sã cádá-ndó nàcuáa vá cãháⁿ ñíí-í núú-ndó òré quixi-í quixi coto ñaha-í xii-ndo. Te cuìnì-í sá ndìhi tnúhu ñíí iní-xi cãháⁿ ndìhi-í cue ñáyiu cãchí sá ìíⁿ-ni cuu-í ndìhi cue ñáyiu ñá túú sàndáá iní tnúhu Xítohó Jesucrístú. ³Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tĩhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, ⁴te ni ìíⁿ sá ío ñuyú-a ñá túú chindee ñaha-xi, chi mee Yã Ndiöxí chindèe ñaha-gá xii-ndí dáquèe tĩhú duuⁿ-ndí nchaa núú sã cuèhé sá dúhá. ⁵Te xíãⁿ nũu ñihí-ndí tnúhu cãháⁿ-ndí sàdí-ndí yuhu cue ñáyiu cãháⁿ tnúhu sá ñà túú cùu váha iní Yã Ndiöxí, ñáyiu xiquide nínu mee-xi cãchí sá ñà túú nàndíhi tnúhu-gá. Te quide-ndí sá ñáyiu-áⁿ quindáá iní-yu tnúhu Xítohó Jesucrístú. ⁶Te nchúhú sa ndècu túha-ndí sá dáquètĩhú-ndí cue ñáyiu ñá túú cuìnì cada nàcuáa cuìnì Xítohó Jesucrístú, dico díhna-gá xínì ñũhu-xi sá ncháá nchòhó ñáyiu cuìnì cada nàcuáa cuìnì-gá cundáá-ndó.

⁷Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núu cùtnunì ndáá iní-ndó sã cúú-ndó cuendá Xítohó Jesucrístú, te ñiu-ni ducaⁿ tàú-ndó càni iní-ndó cuendá-ndí tucu. ⁸Te Xítohó Jesucrístú ní taxi-gá tnúhu ndee ìní ndécú ndìhi-ndí sá dánèhé ñáhã-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sã dánèhé ñáhã-ndí xii-ndo nàcuáa cuíta nihnu-ndo, te cuèi na chido-gá-í cãháⁿ-í cada nínu-í mèe-í cuendá tnúhu ndee ìní ní taxi Xítohó Jesucrístú ndécú ndìhi-ndí, dico vá cúcãháⁿ núù-í chi cãháⁿ ndáá-í. ⁹Te ñá túú cuìnì-í sá nchòhó cani iní-ndó sã yũhú dáyũhú ñáhã-í xii-ndo nàcuáa

ndùu tnúhu càháⁿ-í núú tùtú-í. **10**Te dava-ndo càchí-ndó sã ténàá ñáhà-í xii-ndo nũú tùtú-í, te mee-ni tnũhu càhnu sá ïo cùnuu cuu-xi, te càchí tucu-ndo sã òré ndécú ndìhi ñaha-í xii-ndo te ñá túú càa-í sá cúu-í ìⁿ tée cùu váha cùu dico iní-ndó, te càchí tucu-ndo sã ñà túú tnàhá iní-ndó nàcuáa quide-í òré dácuaá ñaha-í xii-ndo. **11**Te nchòhó ñáyiu ducaⁿ càháⁿ cada cuendá váha-ndo sã dàtná-ni càháⁿ-ndí núú tùtú-ndí ñu-ni ducaⁿ quide-ndí òré ndécú ndìhi ñaha-ndí xii-ndo.

12Te nchúhú, vá cúu tnàhí càháⁿ-ndí sá ìⁿ-ni cuu-ndí ndìhi cue ñáyiu càháⁿ váha cuendá méé-xí, chi ñáyiu-áⁿ sání ìní-yu ná cúu sã váha te quidé-yu te xíãⁿ càchí-yu sá ïo váha quidé-yu, te càchí-yu sá quidé váha-gá-yu dácúxí tnàha ñáyíu-yu, te sá dúcáⁿ càháⁿ-yu te quidé-yu dàtná quidé cue ñáyiu ñá túú tnàhí cùnuni iní-xi. **13**Te dico nchúhú ñá túú xidó-ndí càháⁿ váha-ndí cuendá-ndí, chi càháⁿ váha-ndí cuendá-ndí dico nàcuáa ndùu chiuⁿ ní taxi Yá Ndiöxí càháⁿ-ndí, chi mee-gã ní cachí-gá ndèe není sáá-ndí càháⁿ-ndí tnúhu-gá, te ní sáá-ndí ndée ñuú-ndó càháⁿ-ndí tnúhu-gá. **14**Te vitna ndècu ndìhi-ndí tnúhu ndee ìní sá tnàhá nchòhó cuu càháⁿ ndìhi ñaha-ndí xii-ndo, chi díhna-gá nchúhú ní quixi-ndí ní càháⁿ-ndí tnúhu Xítohó Jesucrístú ñuú-ndó, tnúhu sá càháⁿ nàcuáa naníhí tàhú-ó.

15Te nchúhú ñá túú quide cahnu-ndí méé-ndí cuendá chiuⁿ quide dava-gá-güedé quesaha-ndí sá chíuⁿ mèe-ndí cúu-xí. Te cuení-ndí sá nchòhó cuita quindáá-gá iní-ndó Xítohó Jesucrístú, te ducaⁿ te níhí-gã-ndí nàcuáa cada-ndí chiuⁿ-gá nchaa dava-gá xichi núú ñí cachí-gá cada-ndí chiuⁿ-gá.

16Chi càháⁿ-ndí tnúhu-gá tnúhu sá càháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi càháⁿ-ndí, te vá cáda càhnu-ndí méé-ndí cuendá chiuⁿ sá sà ní quide dava-gá-güedé.

17Te cue ñáyiu cuení cada càhnu mee-xi te vá dúcáⁿ càdá-yu, chi mee Xítohó Jesucrístú ná càda cahnú-yu-gá. **18**Te nchaa ñáyiu na càháⁿ váha Xítohó Jesucrístú cuendá-yu, ñáyiu-áⁿ cúdiú-yu núú-gã, te ñá túú cùdiú-yu núú-gã cuendá sá càháⁿ váha-yu cuendá méé-yu.

Cuendá té Păblú ndìhi cuendá cue tée càchí sá càháⁿ tnúhu Yá Ndiöxí te ñá ndàá

11 **1**Te cuení-í sá nchòhó cada ndee ìní-ndó cùndedóho-ndo tnũhu na càháⁿ-í, chi càháⁿ-í dàtná càháⁿ cue ñáyiu ñá túú cùnuni iní-xi, te cuèi nása-gá ná cùnduu tnúhu càháⁿ-í dico chí cáda ndèe iní cùndedóho-ndo. **2**Chi yúhú ío ñũhu iní ñáhà-í xii-ndo dàtná ñúhú ìní ñáhá mèe Yá Ndiöxí xii-o, te ní càháⁿ-í tnúhu Xítohó Jesucrístú núú-ndó nũu xíãⁿ ní tnàhá tnúhu-ndo ndìhi-gá vitna, te sá dúcáⁿ ñí quide-í te cada iní-ndó sã yúhú cúu-í dàtná ìⁿ tée xica ndáhú te nchòhó cúu-ndó dàtná ìⁿ xíchí cuéchí, te Xítohó Jesucrístú cúu-gã dàtná ìⁿ tée tnándaha ndìhi xíchí

cuéchi-ăⁿ. Te ducaⁿ càda iní-ndó chi na sàá nduu te yúhú na càni cuendá ñáhà-í xii-ndo nũú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. ³Te yùhú-í sá sàcuíhná dandàhú ñáhá-xí xii-ndo vá cání-gă iní-ndó cànchicúⁿ nihnu-ndo nì yuhu nì iní-ndó ìchi Xítohó Jesucristú dàtná nchìcúⁿ nihnu-ndo vîtna. Te yùhú-í ná yáha-ndo dàtná ní yáha tá Èvá, chi sàcuíhná nì nduu-xi cóó nì dándàhú ñáhá-xí xii-xi, chi sàcuíhná-ăⁿ ïo váha ní xito-xi nàcuáa ní quide-xi ní dándàhú-xi tá Èvá-áⁿ. ⁴Te nchòhó, quidé ndèe iní-ndó sàcúndedóho-ndo nchàa tnúhu càháⁿ cue tée càháⁿ ingá núú tnúhu cuendá Jèsús tnúhu sá ñà túú dènehé ñáhá-ndě xii-ndo, te quide ndee tucu iní-ndó ndèdóho-ndo dènehé ñáhá-güedě xii-ndo cuendá ingá espíritú, te ñá díú cuendá Espíritú Yă Ndiöxí sá nì ngúndecu ndìhi-ndo dènehé ñáhá-güedě xii-ndo, te quide ndee tucu iní-ndó ndèdóho-ndo dènehé ñáhá-güedě xii-ndo ingá núú tnúhu sá cächí-güedé càháⁿ nàcuáa naníhí tàhú-ndó, te ñá díú nàcuáa ndùu tnúhu sá ni sàndáa iní-ndó cuendá naníhí tàhú-ndó càháⁿ-güedé. ⁵Te cue tée ducaⁿ càháⁿ-áⁿ cächí-güedé sá Yă Ndiöxí ní tendaha ñàha-gá xii-güedé xíca cùu-güedé càháⁿ-güedé tnúhu-gá te ío cùnūu-güedé, dico ñá ndàá sá càháⁿ-güedé tnúhu-gá. Te yúhú cùtnùnì iní-í sá cuè tée-ăⁿ ñá túú cùnūu-güedé dàtná cùnūu yúhú. ⁶Te cuèi ñá túú càháⁿ-í dàtná càháⁿ cue tée ío váha sàá díquí-xi dico ío váha cùtnùnì iní-í cuendá nchaa sá dácuaàha-í, te yúhú sa quide-í nàcuáa cutnùnì iní-ndó sã ïo váha cùtnùnì iní-í nàcuáa ndùu nchaa tnúhu càháⁿ-í.

⁷Te cudana te sàni iní-ndó sã yùhú ñá túú ní quide váha-í sá nì quide-í mèe-í dàtná ìⁿ tée ío ndàhú iní-xi, chi ñá túú ní xícaⁿ-í yáhu-í núú-ndó cuendá sá nì cáháⁿ-í tnúhu Yă Ndiöxí tnúhu sá càháⁿ nàcuáa naníhí tàhú-ó nũú-ndó. ⁸Te ní queheⁿ-í díhúⁿ nì taxi dava-gá cue ñáyiú ndècu ichi Xítohó Jesucristú, te díhúⁿ-ăⁿ nì dándóñùhu-í ní saaⁿ-í nchaa sá nì xini ñùhu-í cùtnàhá ní cáháⁿ-í tnúhu Xítohó Jesucristú núú-ndó. ⁹Te cùtnàhá ní xíndecu ndìhi ñaha-ï xii-ndo te áma ní xóo cumánì sã xínì ñùhu-í, te ñá túú nã ní xícaⁿ-í núú ni ìⁿ-ndo. Chi cue ñáyiú xíndecu ichi Xítohó Jesucristú ndécú dístítú Macèdoniá ní quixí-yu ní taxí-yu sá cúmăní xii-í, te ñá túú tnàhí ni dàsátú iní ñáhà-í xii-ndo cãcáⁿ-í núú-ndó nũu ná cúú sã xínì ñùhu-í, te diu-ni ducaⁿ càda-í. ¹⁰Te diu-ni duha cáháⁿ váha-í cuendá-í te ni ìⁿ cue ñáyiú dístítú Acăyá vá nìhí-yu tnúhu cùñàhá-yu xii-í cuendá cadí-yu yuhu-í. Te mee Xítohó Jesucristú náhá-gă sá ndàá càháⁿ-í dàtná càháⁿ ndáá méé-gă. ¹¹Te cudana te sàni iní-ndó sã sà dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yă Ndiöxí náhá-gă sá yùhú ío cùu iní ñáhà-í xii-ndo.

¹²Te nàcuáa-ni ta quide-í véxi te diu-ni ducaⁿ càda-í cuendá sá cuè tée cuìnì cada nínu mee-xi cächí sá ìⁿ-ni cuu ndìhi ñaha-güedé xii-í vá nìhí-güedé tnúhu cáháⁿ-güedé cachí-güedé sá ìⁿ-ni chiuⁿ quide ndìhi

ñaha-güedé xii-í. **13**Te cue téé-áⁿ cächí-güedé sá Yă Ndiöxí ní tendaha ñaha-gá xii-güedé xícá cùu-güedé cãháⁿ-güedé tnúhu-gá dico ñá ndàá, chi mee-ni dândahú-güedé ñáyiu ndihi tnúhu cãháⁿ-güedé, te quide-güedé dàtná quidé cuè téé cãháⁿ tnúhu Xítohó Jesucrìstú dico ñá ndàá sá cúú-güedé cue téé cãháⁿ tnúhu-gá. **14**Te vá cúnũhu-o sã dúcáⁿ quide cue téé-áⁿ, chi mee sàcuíhná quidé-xí sã cúú-xí dàtná ìⁿ espíritú xínú cuèchi núú ïo váha càa ndecu Yá Ndiöxí dico ñá ndàá sá xínú cuèchi-xi xíáⁿ. **15**Te xíáⁿ vá cúnũhu-o sã cuè téé xínu cuechi núú-xi quide-güedé sá cúú-güedé cue téé quide váha chi ñá ndàá sá quidé vãha-güedé chi dândahú-güedé ñáyiu. Te nàcuáa ndùu nchaa sá quidé-güedé te ducaⁿ nãcháhu-güedé núú Yă Ndiöxí.

**Té Pãblú ío ndòho-dé cuendá sá cúú-dě téé
cãháⁿ tnúhu Xítohó Jesucrìstú**

16Te yúhú cãháⁿ tucu-í dóho-ndo sã vã cání ìní-ndó sã yúhú cúú-í ìⁿ téé cãháⁿ lúcú cãháⁿ duha, te núu dava-ndo dùcaⁿ sani ìní-ndó dico chí cádá ndèe ìní cundedóho-ndo tnũhu na cãháⁿ-í cuendá ducaⁿ tnàhá-í cada nínu-í mèe-í. **17**Te vitna na cãháⁿ-í dàtná cãháⁿ ìⁿ téé ñá túú cùtnuní ìní-xi, chi tnúhu cãháⁿ-í ñá túú ìⁿ-ni cuu-xi ndihi tnúhu Xítohó Jesucrìstú, chi vitna cãháⁿ-í nàcuáa cada nínu-í mèe-í. **18**Te ío cuéhé ñáyiu quide nínu mee-xi cuendá nchaa sá ìo ñuyíú-a te xíáⁿ nũu tnàhá-í cuìní-í cada nínu-í mèe-í. **19**Chi cùtnuní sá nchòhó quidé ndèe ìní-ndó sàcúndedóho-ndo nchaa tnúhu cãháⁿ cue téé cãháⁿ lúcú cãháⁿ duha, te ducaⁿ quide ndee ìní-ndó sàcúndedóho-ndo tnũhu cãháⁿ-güedé chi cächí-ndó sã ïo túha-ndo. **20**Te nchòhó, quide ndee ìní-ndó tnèi-ndo nchaa tnúhu cãháⁿ cue téé quide yica ñaha xii-ndo sá cúnú cuèchi-ndo núú-güedé, te xícáⁿ-güedé nándi sá xícáⁿ-güedé núú-ndó, te tàxi tnuní ñáhá-güedé xii-ndo, te quide-güedé sá ïo cùnuu-güedé ndécú ndihi ñaha-güedé xii-ndo, te cãniha-güedé xii-ndo, te cuèi nchaa xíáⁿ quidé ñaha-güedé xii-ndo dico quide ndee-ni ìní-ndó. **21**Te nchòhó cächí-ndó sã cúú-ndí cue téé ñá túú ní cùyii cada nándi sá cádá, te ndáá chi ñá túú ìⁿ-ni cuu-ndí ndihi cue téé ducaⁿ xíquide.

Dico núu cue téé-áⁿ cùyii-güedé quidé ñinu-güedé mée-güedé, te tnàhá-í cùyii-í ducaⁿ càda-í. Te sá dúhá cãháⁿ-í te cãháⁿ-í dàtná ìⁿ téé ñá túú cùtnuní ìní-xi. **22**Te núu quide cahnu-güedé mée-güedé cuendá sá cãháⁿ-güedé tnúhu hèbreú, te yúhú tucu ñiu-ni téé cãháⁿ tnúhu hèbreú cúú-í, àdi quide cahnu-güedé mée-güedé cuendá sá cúú-güedé cue téé isràél, te yúhú tucu tnàhá-í cúú-í téé isràél, àdi quide cahnu-güedé mée-güedé cuendá sá cúú-güedé ñaní tnáhá ndíi Àbrahám, te tnàhá yúhú cúú-í ñaní tnáhá ndíi Àbrahám tucu. **23**Àdi quide cahnu-güedé mée-güedé cuendá sá sání ìní-güedé sá díú nũú Xítohó Jesucrìstú xínú cuèchi-güedé,

dico yúhú ío-gá xínú cuèchi ndisa-í núú-gă. Te sá dúhá quide cahnu-í mée-í te cãháⁿ-í dàtná ìⁿ tée ñá túú cùtnuní iní-xi, te yúhú cúu-í ìⁿ tée ío-gá quidé chiùⁿ-gá dàcúúxí cuè tée-áⁿ, te vãi xito ní cuu càniha ñáyiu xii-í, te vãi xito ní cuu chìhi ñahá-yu vecaá xii-í, te vãi xito ní cuu cãcu cãcu cahni ñaha ñáyiu xii-í. **24**Te cue ñáyiu israhél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquëe-yu ócú sáhúⁿ cúmí ñii sátà-í. **25**Te úní xito ní caniha tùcu ñáyiu xii-í ndihì carrutí, te ìⁿ xito ní sáha yúú ñáhã-yu xii-í, te ní cuu úní xito quëe naa bàrcú xití ndute òré sácúhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ niú núú ndute làmár. **26**Te ío titní xichi ní cuu xìca cuu-í, te dava xichi ní cácu cuido ñaha ndùte ñuhu xii-í, te dava xichi ní cácu duhu ñàdúhú nchaa ndachìuⁿ-í, te dava xichi ní cácu cada ñaha cuè ñáyiu cùu ndi mee-í ìⁿ sá cádá ñahá-yu xii-í, te diu-ni ducaⁿ ñí cácu cada ñaha tùcu cue ñáyiu ñá túú cùu ndi mee-í ìⁿ sá cádá ñahá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiu xii-í ìⁿ sá cádá ñahá-yu, te diu-ni ducaⁿ cãcu cãcu quiní-í tnúndòho oré ñúhù-í bàrcú cuáháⁿ núú ndute làmár. Te cue ñáyiu cãchí sá ndécú ìchi Xítohó Jesucristú te ñá ndàá cãcu cãcu cada ñahá-yu xii-í ìⁿ sá cádá ñahá-yu. **27**Te ío ndòho-í cuèndá chiùⁿ quide-í chi ío xàú-í, te ní cuu vãi xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnahí ná xèxì-í cuèndá chiùⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú ñihí-í dóó cuihnu-í.

28Te ñá díú-ní xǎⁿ chi ìⁿ nduu ìⁿ nduu ío sàni iní-í cuèndá nchaa ñáyiu ndècu ichi Xítohó Jesucristú xíndecu nchaa xichi. **29**Te ndèda-ni càa ñáyiu ñá túú ñihí ndéé cùndecu ichi Xítohó Jesucristú, te ío cùndahú iní-í chi sànuu sá tnahá-í ñá túú ñihí ndéè-í cundecu-í ichi-gá sá dúcáⁿ quidé-yu. Te núu ìⁿ ñáyiu quidé-yu sá ìⁿ nchohó ñáyiu ndècu ichi Xítohó Jesucristú quidé-ndó ìⁿ sá ñà túú tàú-ndó càda-ndo te vá cúú vãha iní-í chi cudéèⁿ-í. **30**Te núu xini ñuhu-xi sá cádá cahnu-í mée-í, te cuu ducaⁿ càda-í te cãháⁿ-í mee-ni cuèndá nchaa sá quidé nàcuáa ñá túú ñihí ndéé yèqui cuñú-í. **31**Te Dútú Ndiõxí Yaá cúú Tãtã Xítohó Jesucristú nahá-gă sá yúhú cãháⁿ ndáá-í núú-ndó, te diu-gá tàú-gá cachí-ó sã ìo cahnu cuu-gá ñi caa ñi quíhíⁿ. **32**Te cútnahá ní xíndecu-í ñuú Dàmascú te tée cùu gobiernú tée cùndihì tée yìndaha ñáyiu nàni Aretás ní taxi ndecu-dé cue tée ní xíndedí yuyèhe sá ñúhú dòco ñuú cuèndá òré quee-í te tñii ñaha-güedë xii-í ní cùu. **33**Dico yúhú ní queè-í ìⁿ xití tídihi, te cue ñáyiu cùndihì ñaha xii-í ní queñuhu ñahá-yu ndàa ventaná nchìi yiqui naha sã ñúhú dòco ñuú-áⁿ, te ducaⁿ te ní cácu-í ñá túú ní ndàcu-güedé tñii ñaha-güedë xii-í.

**Té Păblú cǎháⁿ-dé sá ïo vii cǎa sá nǐ
dǎnèhé núú ñáhá Xítóhó Jesucrístú xii-dé**

12 ¹Te ñá túú ndèé nándǐhi-xi sá cǎháⁿ váha-o cuendá méé-ó, dico vitna xini ñuhu-xi ducaⁿ cada-í chi cǎháⁿ-í nàcuáa ní quide ñaha Xítóhó Jesucrístú xii-í, chi ní quide-gá sá nǐ cutnùnǐ iní-í nàcuáa ndùu tnúhu-gá, te vǎi núú sǎ nǐ dǎnèhé núú ñáhá-gǎ xii-í. ²Te yúhú xini-í ïⁿ téé sàndáá iní ñáhá xii Xítóhó Jesucrístú, te sa ní cuu úxícúmǐ cuǐá sǎ tée-áⁿ nǐ sáá-dé ndéé andiu cùu uní, te ñá túú xini-í te núu ndihi yiqui cùñú-dé ní sáá-dé àdi ñáhá, chi ïⁿ dǐi dǐi-ni Yá Ndiöxí náhá-gǎ te núu nása cǎa-dé ní sáá-dé. ³Te yúhú cǎháⁿ ndáá-í cuendá tée-áⁿ, dico dàtná ní cachí-í sá ñá túú xini-í te núu ndihi yiqui cùñú-dé ní sáá-dé andiu àdi ñáhá, chi mee Yá Ndiöxí náhá-gǎ te núu nása cǎa-dé ní sáá-dé. ⁴Te tée-áⁿ nǐ sáá-dé ïⁿ xichi núú ïo váha cǎa andiu, te yacáⁿ ní xíndedóho-dé tnúhu mee-ni sǎ cúú-xí cuendá méé-dě, te tnúhu-áⁿ vǎ cúú tnàhí cǎháⁿ-dé núú nǐ ïⁿ ñáyiú. ⁵Te yúhú quidé ñinu-í tée-áⁿ, dico mee-í ñá túú cǎháⁿ váha-í cuendá-í cuendá cada nínu-í méè-í, chi cǎháⁿ-ni mee-ni cuendá nchaa sá quidé nàcuáa ñá túú ñihí ndéé yiqui cuñú-í. ⁶Te núu dǐcó yúhú cuiní-í te cuu cǎháⁿ váha-í cuendá-í cuendá cada nínu-í méè-í, te núu ducaⁿ na cǎháⁿ-í te ñá túú cùu-xi ïⁿ tnúhu neñúú cǎháⁿ-í, chi cùu-xi ïⁿ sá cǎháⁿ ndáá-í te núu na cǎháⁿ-í. Dico vá dúcáⁿ cǎda-í chi cuiní-í sá nchòhó cada cuendá-ndó nàcuáa ndùu tnúhu cǎháⁿ-í ndihi nàcuáa quide-í, te ducaⁿ mèe-ndo cǎháⁿ-ndó te núu ná tée cùu-í, te ñá dǐú sǎ yúhú cǎháⁿ váha-í cuendá méè-í cuendá nchòhó cachí-ndó sǎ ïo cùnuu-í.

⁷Te sá nǐ dǎnèhé núú ñáhá Xítóhó Jesucrístú xii-í cúú-xí sǎ xidó ío váha, te cuendá sá vǎ cǎdá cǎhnu-í méè-í ñuu xǐáⁿ Xítóhó Jesucrístú ní quide-gá duha ndòho yiqui cuñú-í vitna. Te sá dúcáⁿ quide ñaha-gá xii-í te xǐáⁿ sácuíhná nǐ níhí-xi ichi cǎhnu dandoho ñaha-xi xii-í. ⁸Te ní cuu úní xito cǎháⁿ ndàhú-í núú Xítóhó Jesucrístú sá ná cǎdá-gǎ nàcuáa vá ndóhó-gǎ yiqui cùñú-í. ⁹Dico mee-gǎ cǎchí-gá xii-í: “Yúhú ío cùndahú iní ñáhà-í xii-n chǐndee ñaha-í, te ñá túú ñǎ cùmǎní xii-n, te cùtnuní sá ïo-gá chǐndèe-í cue ñáyiú ñá túú ñihí ndéé cùndecu”, duha ní cachí-gá xii-í. Te xǐáⁿ ñuu yúhú ío cùdǐí iní-í sá ñá túú ñihí ndéè-í ndécù-í, chi diu cuendá xǐáⁿ Xítóhó Jesucrístú ñá túú dàña nihnu ñaha-gá xii-í chǐndèe ñaha-gá. ¹⁰Te xǐáⁿ ñuu cùdǐí iní-í sá dúhá ñǎ túú ñihí ndéè-í ndécù-í, te cùdǐí tucu iní-í cuendá nchaa tnúhu cuèhé tnúhu duha cǎháⁿ ñáyiú cuendá-í, te cùdǐí iní-í cuendá nchaa sá ndóhò-í, te cùdǐí tucu iní-í cuendá sá quidé ñaha ñáyiú xii-í, te cùdǐí tucu iní-í cuendá nchaa dava-gá sá ndóhò-í cuendá Xítóhó Jesucrístú. Te òré ñá túú ñihí ndéè-í te Xítóhó Jesucrístú chǐndèe ñaha-gá xii-í ñihí ndéè-í.

Té Păblú ío sàni iní-dé cuendá cue ñáyiú x̄ndecu ichi Xítóhó Jesucrístú ndécú ñúú Còrintú

11Te cùu-í dàtná ìíⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ cǎháⁿ-í, dico mee-ndo tàú-ndó cǎháⁿ váha-ndo cuendá-í ní cùu. Te dava cue téé ío quide cahnu-güedé méé-güedě, te cǎchí-güedé sá Xítóhó Jesucrístú ní táúchíúⁿ-ǎ sá càháⁿ-güedé tnúhu-gá, dico yúhú cúnùu-gá-í dácúúxí cuè téé-áⁿ cuèi ñá túú vėdana ná cùu-í ndécù-í ñuyíú-a. **12**Te cùtnàhá ní x̄ndecu ndìhi ñaha-í xii-ndo ìo ní quide cǎhnu iní-í nándi sá ñí yáha-í ní quide-í chiuⁿ Xítóhó Jesucrístú sá cúu-xí-ndó. Te ní chindee ñaha-gá xii-í ní quide-í titní núú sǎ vǎ yǒ tnàhí ndàcu cada te ní cuñúhu-ndo, te sá dúcáⁿ ñí chindee ñaha-gá xii-í ní cutnùní iní-ndó sǎ yǔhú cúu ndìsa-í ìíⁿ téé ní cǎchí Xítóhó Jesucrístú sá càháⁿ-í tnúhu-gá. **13**Te yúhú ìíⁿ-ni quide ndìhi ñaha-í xii-ndo ndìhi nchaa dava-gá cue ñáyiú ndècu ichi Xítóhó Jesucrístú, te dícó-ni sá yǔhú ñá túú ní cuíní-í taxi-ndo sǎ xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuíní-í chindee ñaha-ndo te chí cǎdá cǎhnu iní ñáhá xii-í.

14Te vitna sa ndècu túha-í sá quíxì-í núú ndécú-ndó, te sá quíxí còto ñaha tucu-í xii-ndo cùu-xi xito cuu úní sá quíxì-í, te cuíní-í sá vǎ dándìhú-ndó ìní-ndó ndùcu-ndo sá táxì-ndó cùu xii-í, chi ñá díú xǎⁿ ndèé iní-í chi mee-ndo ndèé iní-í quixi-í. Te duha càháⁿ-í chi nchòhó xíní-ndó sǎ cuè téé cùu tátá sǎñaha-güedě sá cúu-xí cuè déhe-güedé te ñá díú cuè déhe-güedé sǎñaha-güedě sá cúu-xí mèe-güedé. **15**Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñaha-í xii-ndo cùndecu váha-ndo sǎ cúu-xí Yǎ Ndiǒxí chi ío cùdífí ìní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá cǎvihi-ndo xii-í.

16Te ñaha-ndo sá ñá túú ní dándìhú-í iní-ndó ñá taxi-ndo cùu xii-í, dico dava-ndo cǎchí-ndó sǎ ìo váha ní xito-í nàcuáa ní quide-í nàcuáa ní dándàhú ñáhà-í xii-ndo. **17**Te chí càháⁿ te núu yúhú ní dándàhú ñáhà-í xii-ndo ndìhi cue téé ní tendaha-í ní quixi coto ñaha xii-ndo. **18**Te ní cǎháⁿ ndàhú-í núú tǎ Títú ndìhi núú ìngá tucu téé ndècu ndìhi-o ichi Xítóhó Jesucrístú ní quixi coto ñaha-güedě xii-ndo. Te nchòhó cùtnùní iní-ndó sǎ tǎ Títú ñá túú ní dándahú ñáhá-dě xii-ndo, te ducaⁿ chi ìíⁿ-ni sàni iní-ndí te ìíⁿ-ni quide-ndí.

19Te cudana te sàni iní-ndó sǎ sá dúhá càháⁿ-ndí te tàunihnu-ndí méé-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi cǎháⁿ-ndí chi ndècu ndìhi-ndí Xítóhó Jesucrístú, te mee Yǎ Ndiǒxí ñáhá ndǎá-gá nàcuáa ndùu tnúhu càháⁿ-ndí, te nchaa sá càháⁿ-ndí cúu-xí

cuendá nchòhó cue ñáyiú ío cùu iní-ndí, te cãháⁿ-ndí nãcuáa cundecu váha-ndo ìchi Xítohó Jesucrìstú. ²⁰Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nãcuáa cuu váha iní-í, te sá dúcáⁿ te yúhú cáháⁿ-í nãcuáa vá cúú váha iní-ndó, te ducaⁿ ïo sàni iní-í cuendá-ndó chi na cuáháⁿ òré quexìo-í te nàá-ndó, àdi ndecu-ndo ichi cuédú íní, àdi cudééⁿ nũú tnáhá-ndó, àdi ñá túú cùu ìiⁿnuu-ndo ndecu-ndo, àdi cáháⁿ cuèhé-ndó cuendá tnàha ñáyiú-ndo nũú chítú nũú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹Te ío sàni iní-í cuendá-ndó chi na cuáháⁿ òré quixi-í, te Yá Ndiöxí cada-gá te cucahaⁿ núù-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sá cuèhé sá dúhá ñí ngüíta-ndo quide-ndo ndéé sanduu, te vài-ndo ní ngüíta-ndo dùcaⁿ quide-ndo, chi ndècu-ndo ichi díí ìní te nándi-gá nchaa sá cuèhé sá dúhá quide-ndo, te ducaⁿ ïo ndíhú iní-í te núu vátá dáñá-gã-ndó nchàa xíãⁿ.

Tnúhu ndéé núú ñí ndíhi-ná

13 ¹Te sá quixì-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te cãchí tnúhu-í xii-ndo sã òré cundáa cuéchi-ndo te canehe núú ũú àdi úní ñáyiú cáháⁿ ndáa nãcuáa ndùu cuéchi-ndo. ²Te yúhú sa ní cáháⁿ-í dóho-ndo cǔtnáhá ní quixi-í ní quixi coto ñaha-í xii-ndo xito cuu úú, te diu-ni ducaⁿ cãháⁿ tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáyiú ní cunduu ñí ngüíta quide nchaa sá cuèhé sá dúhá, tenàa ñáhà-í xii-ndo òré quexìo-í te núu vátá dáñá-gã-ndó nchàa sá cuèhé sá dúhá quide-ndo te tnáhá nchaa dava-gá-ndó tènàa ñáhà-í xii-ndo. ³Te nchòhó cuiní-ndó quèní-ndó nũu ndáa sá quidè-í núú Xítohó Jesucrìstú cãháⁿ-í yuhu-gá, dico dàvã-ãⁿ cutnùní ndáa iní-ndó. Te Xítohó Jesucrìstú quidé-gã nãcuáa cutnùní iní-ndó sã ïo cãhnu cuu-gá te ñá túú quide-gá dàtná quidé ìiⁿ ñáyiú ñá túú ñíhí ndéé cundecu. ⁴Te Xítohó Jesucrìstú ní ndoho-gá dàtná ìiⁿ ñáyiú ñá túú ñíhí ndéé cundecu, chi ní sahní ñaha-güedě xii-gá núú cùrúxí dico mee Yã Ndiöxí ní quide-gá ní ñíhí ndéé Xítohó Jesucrìstú ní ndoto-gá ndécú-gã vitna, te tnáhá nchúhú tucu ducaⁿ yãha-ndí ñá túú ñíhí ndéé-ndí cundecu-ndí, dico mee Yã Ndiöxí chíndèe ñaha-gá xii-ndí ñíhí ndéé-ndí ndécú-ndí cuendá sá ndécú ndíhi-ndí Xítohó Jesucrìstú, te xíãⁿ nũu ndàcu-ndí quidé-ndí nãcuáa tàú-xi cunduu sá cúú-xí-ndó.

⁵Te chí cáda cuendá váha te núu ndisa sá sàndáa iní-ndó tnúhu Xítohó Jesucrìstú, te núu ndáa sá ndécú-ndó ìchi-gá te cùtnuní iní-ndó sã ndécú-ndó ndíhi-gá. ⁶Te cuiní-ndí sá nchòhó cutnùní ndáa iní-ndó sã nchúhú ndécú ndíhi ndisa-ndí Xítohó Jesucrìstú. ⁷Te nchúhú cãháⁿ ndíhi-ndí Yã Ndiöxí cuendá-ndó cuendá sá vã cáda-ndó ñí ìiⁿ sá cuèhé sá

dúhá, te vá cání ìní-ndó sǎ sà dúcáⁿ cǎháⁿ ndíhi-ndí-gá cuèndá-ndó, te cuìní-ndí sá nchòhó cutnùní ìní-ndó sǎ nchùhú ío ndècu yíñuhu-ndí núú-gǎ, te ñáhá chi cǎháⁿ ndíhi-ndí-gá cuèndá-ndó chi cuìní-ndí sá nchòhó cada váha-ndo cùndecu-ndo cuéi sàni ìní-ndó sǎ nchùhú cúú-ndí cue tée ñá túú ndècu yíñuhu núú-gǎ. ⁸Te nchùhú mee-ni cǎháⁿ váha-ndí cuèndá tnúhu ndáá tnúhu Yá Ndiöxí, te ñá túú cǎháⁿ-ndí ìíⁿ tnúhu sá ñà túú tàú-xi cǎháⁿ-ndí cuèndá tnúhu-áⁿ. ⁹Te cùdíí ìní-ndí sá ñà túú-gǎ xíní ñùhu-xi cada-ndí nàcuáa níhí ndéé-ndí tenàá ñáhá-ndí xii-ndo cǎháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchùhú cǎháⁿ ndíhi-ndí Yá Ndiöxí cuèndá-ndó cuèndá sá nchòhó cundáá-ndó cùndecu-ndo ñá túú-gǎ ná cumání-ndó núú-gǎ. ¹⁰Te xǎⁿ núu duha ndùu nchaa tnúhu tè-í núú tütú-a daquixi-í ndaha-ndo vitna ñá túú ndècu ndíhi ñaha-í xii-ndo, cuèndá sá òré ná cùndecu ndíhi ñaha-í xii-ndo te vá ïo níhi cǎháⁿ-í dóho-ndo nàcuáa ndùu tnúhu ndee ìní ní taxi Xítóhó Jesucrístú ndécú ndíhi-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuèndá sá cánúichi ñaha-í xii-ndo cuíta nihnu-ndo.

¹¹Te vitna nchaa nchòhó ñáyíu ndècu ndíhi-ndí ichi Xítóhó Jesucrístú ío quíde ndee ìní ñáhá-ndí xii-ndo, te ío chí ndúcú nàcuáa cada-ndo cùndáá-ndó núú Yá Ndiöxí cuèndá sá ñà túú tnàhí-gá ná cùmání-ndó núú-gǎ, te ndee ndèe cada ìní-ndó cùndecu-ndo, te chí cúú ìíⁿnuu cundecu ndíhi tnaha, te ducaⁿ te Yá Ndiöxí cundecu ndíhi ñaha-gǎ xii-ndo chí ío cùu ìní ñáhá-gǎ xii-o, te díu-gá quídé-gǎ ío váha cùu ìní-ó ndècu-o. ¹²Te ndíhi tnúhu yíñùhu chí cádá ndèe ìní tnáhá. ¹³Te nchaa ñáyíu cùu cuèndá Yá Ndiöxí ndécú ìha quíde ndee ìní ñáhǎ-yu xii-ndo.

¹⁴Te xicáⁿ táhú-ndí núú Xítóhó Jesucrístú sá ïo na chìndee chitúu ñaha-gǎ xii-ndo. Te mee Yá Ndiöxí ná cádá-gǎ nàcuáa cutnùní ìní-ndó sǎ ïo cùu ìní ñáhá-gǎ xii-ndo, te Espíritú-gá cundee cùu cahnu ìní-ndó cùndecu-ndo. Te ducaⁿ na cùnduu. Te ío chí cádá ndèe ìní-ñá vitna.